

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY

07

14 OCT 1951

T 5470 / 1140

白田草堂存稿卷之二十

寶應王懋竑予中甫著

啟

上屠老師啟

恭惟老夫子閣下巖廊雅望社稷重臣正色直辭儼汲長孺之節槩宏才偉略廓李文饒之規模初從牒於有司聲名藉甚旋擢秀於多士風采隱然蔚矣文章之宗卓哉公輔之器惟信道而自致未嘗有毫毛之屈於人斯當官而直行豈肯以斗升之累乎已撥煩理劇肆明通敏達之材稽古愛民施慈惠溫良之政流恩膏於百里上課最於三年以階級之匪遙僅為平進乃 聖明之特許不比常銓歲月遷除方次補於外牧省垣委寄遽改秩於中朝不以



閱閱之勤非有左右之助識之旅見之際拔之選人之中  
遂踐東臺即班左掖耳目是託出納攸司不求赫赫之名  
惟盡翬翬之思言樸忠而可信事切要以必從適當大比  
之時往蒞校文之任閉關塞竇凜白日冰霜之操賞異搜  
竒收明堂棟梁之用爰膺內擢聿換崇資洊歷清曹頻移  
近署京兆原為劇職司隸亦號雄班自機務之分於五城  
且管轄之僅於兩縣已非漢唐之舊猶為畿甸之師尚考  
前脩未聞令譽寬而有制獨高歐薛之風猛則民殘不襲  
趙張之跡更重付以留鑰俾之尹於陪京時值昇平不恃  
邊防之鎮遏秩居清重有同鄉少之徊翔人共推為公才  
帝用思夫舊德若股肱之是賴自內外之均勞百僚欽  
承日夕兼擁旄秉節之寄蒼生倚芘朝野仰鸞臺鳳閣之

儲懋竝下邑鯁生末傳樸學幼尋摘於章句不解包何長  
涉獵於藝文敢云富駱隨行逐隊曾未離於風塵隱奧伏  
閒竊自甘於退處幸出大賢之門下不為斯世之棄人爨  
餘之琴諧搏拊於笙磬溝中之斷附雕斲於榱桷奉訓誨  
以周旋期專愚之不失惟洛邑為奔走之地而舉場實梯  
緣之階天與拙疎性本孤直雖度於今日有十上之困而  
願為先正留一脉之傳迨漂泊以及茲顧倔强之猶昔衆  
皆知其不可已亦笑其何為乃重有此遭逢遂再蒙夫採  
錄擬之上第猥荷卿大夫之誤知寘以乙科自安愚不肖  
之常分答 詔僅成故事莫由竭犬馬之誠致身不自他  
門尚無慚羔鴈之獻奈時日之多滯徒爾旅居嗟饘粥之  
未充并從寄食常遙望夫几席如在雲霄欲敬聆於語言

白田草堂存稿 卷二十一  
僅存寤寐敢因簡牘上候旌麾託緘封其已遲咎濶踈其  
何遠精誠斯極銘鏤不忘非無許國之心少行所學竊緣  
將母之義式遄其歸詎自絕於榮塗綿力薄材固知無補  
於廊廟矢永厲於素節居窮守約庶幾不辱於門墻冒黷  
嚴尊伏增戰灼臨啟不勝翹企依戀之至

上遂寧張老師啟

恭惟老夫子閣下柱石九垓綱維八極經世宰物淵源舊  
學居清任和之閒匡國庇民模範前脩有直方大之器遭  
難值之運股肱耳目謨謀遠繼夫臯夔建無窮之棊舟楫  
塩梅勲庸並等於伊傅凜孤操以厲俗若嚴霜烈日之震  
肅夫四方秉厚德以鎮浮如甘雨和風之長養夫庶類歸  
然一代之望允矣衆正所宗忠結於上而益親道加於

民而不變蓋自早踐青華之選與東馬嚴徐以奮飛亦越  
徧試敷歷之途比卓魯龔黃而上最溫恭恪慎穆然君子  
之猷安靜寬仁藹乎吉人之度徊翔列職領袖清流所至  
留赫赫之名隨在盡翬翬之思泰山喬嶽百司庶尹衆所  
倚以知歸景星慶雲四海九州爭先覩以為快遂受鎮臨  
之重寄洊登岳牧之雄班四國黍苗之膏千里江河之潤  
不局於淺小以悅朝夕而懲貪除虐於民有醲恩厚澤之  
施不取於細碎以立聲威而興利去害於國盡長算遠慮  
之實羣心虛佇 帝眷優嘉浙介東西已著旬宣之茂績  
江橫南北更崇冶鑄之宏功稟采豐華協笙鏞以振響拔  
尤賞異合榱桷以呈材公乃若茲畧無遺於尺寸清則徹  
底不少玷於絲毫曠前後其焉如絕古今而罕覩迨乎宣

房之築特承 聖謨泊於屯氏之通獨持上策省功費同  
於延世多便利過於當時合淮黃以安流無俟東山之問  
水兼運漕以直達且勝印川之河防萬頃蒲葦頓為膏沃  
之野百城捐瘠復還生聚之鄉效逾於昔而益隆民到於  
今其受賜乃定九川而歸禹貢還總六典以冠周官爰陟  
統均聿綜銓管自四曹為紛冗之地而一筆操澄汰之權  
山子之密裁非止門調戶選之舊毛公之清鑒詎同年除  
歲遷之宜克三宅以乂受民列九德而熙庶績朝推耆壽  
國重老成式副巖石之瞻即竚端揆之拜保邦致治以一  
身任安危易俗移風以片言繫輕重立綱陳紀予之畫一  
有明明之章程興孝舉廉返之樸淳皆勉勉之人士在廊  
廟何煩極論而草茅未敢深言必亟根本之圖用念久長

之計待澤者千百國為黎民創非常之元貽謀者萬億年  
為社稷永无疆之祚則勲銘太室懸日月於旂常爵列彤  
廷鞏河山於帶礪不特文章小技韓李歐曾不足以歷其  
籬籓抑且功名緒餘丙魏姚宋不足以臻其閫域矣懋竝  
羈單下士樸鄙庸儒少涉獵於藝文略知采獲長鑽研於  
經術未克證明詎云窺性命道德之微塵粗識理亂興衰  
之故見之言而施之事豈其能然脩之家而獻之廷竟亦  
何有加以性惟拙直落落不合於時兼之學本迂踈硜硜  
自守於己是致進退之用日以差池獨持出處之閑未敢  
蹉跌幸出大賢之門下不為斯世之棄人先羔鴈之資尚  
無慚於林澗蓬鷺鷺之跡仍待放於江湖非無許國之誠  
少行所學輒緣將母之義式遄其歸迨漂泊於三年終遲

迴於一往懷晨昏之戀分自絕於榮塗念肯甘之供冀相  
 從於冷署會台旌之南指獲望音塵值師席之北旋親承  
 訓誨辱獎待之厚逾越尋常蒙申諭之勤丁寧再四舊廁  
 門墻之列已久與夫鑪錘新分咳唾之光更爾加之拂拭  
 拔擢非文詞之末詎止號以門生源流有脈絡之通是可  
 稱曰知己報答未期於何日依倚寧在於他門材類櫟樗  
 庶幾效棖闡店楔之用質同澗勃或可為參苓薑桂之儲  
 窮且益堅當自全於晚節老而彌厲誓不負於初心苟片  
 語之可收願備芻蕘之採擇倘餘齡之未暮猶冀鞭策以  
 勵此以還未知所措謹因小牘上叩崇階更有微誠  
 巨於別紙踽踽自隣於孤立區區有望於躋攀冒黷尊嚴  
 伏增戰灼臨稟啟不勝翹企悚惕之至

上彭館師啟

恭惟老夫子閣下興朝柱石盛世羽儀鍾洪厓之竒九霄  
 特峻毓滙澤之秀四紀遐通學府儒宗溯淵源於陽夏清  
 名雅德並風節於廬陵精研於禮樂詩書匡說張文家法  
 傳之六學包括於羲農虞夏周情孔思公望比之三君掇  
 秋卷之菁華光分桂苑著春闈之雕煥彩散瓊林排金門  
 上玉堂映奎壁之光麗五緯而正色入北扉居東閣選鶴  
 鷺之侶聳孤鳳以高翔蓋漢魏以臺省為清選之班而唐  
 宋以館閣為儲材之地至於近世尤號極榮館中書制誥  
 之文總國史經筵之職以語言議論爰佐昇平由侍從文  
 儒旋登輔相自進用之漸廣致資望之稍輕乃得一世之  
 偉人競傳中朝之盛事聲譽溢於廊廟風采冠乎縉紳高

步承明之廬舉朝無出其右抗論石渠之署同經孰與爭  
先兼之碩抱宏規匪徒以章句自名所學加以澄懷朗鑒  
已可於經綸微見其長致治莫先於育材雕琢瓏磨六瑚  
四璉之寶報國最亟於得士網羅收拾大宋小桷之宜於  
閒暇優游之時為廣大久遠之計試看公門之桃李無非  
太室之棟梁鼓舞精神挾風雨翕張之氣貫通脈絡弘殿  
廷締構之模則是之綱之紀會見琮璜圭璧之陳因以啟  
心沃心竚俟舟楫益梅之任矣懋竝羈單下士寂寞孤生  
才拙性疎固知無補於世伏閒隱隩久甘自棄於時謁從  
寧谷之中復與風塵之役徘徊前路躑躅中塗竊依多士  
之末光幸出大賢之門下長承教誨深荷陶鎔疲駑庶可  
效於馳驅拙鈍亦同登於拂拭乃以私計上叩鴻慈讀福

州之書既念晨昏之久缺罷安陽之檄又虞餽粥之難充  
顧蒙假以便宜許之即以歸省皆因大造遂獲兩全直如  
覆載之恩何啻生成之德迢迢遙於歲月當奔趨以來前  
終戀戀於庭闈卒逡巡而不果頃聞尊命不勝兢惶思嚴  
辦於舟車猶遲疑於進退擬於數旬之內再就千里之道  
力非所堪若於一別之間預指經歲之期心則不忍詎鱗  
甲之是羨古人且不以換夫三公豈雞肋之足嘗今日特  
不免惜夫九仞伏惟肆終始之惠施轉移之仁仍混吹於  
齊竽得同躡夫楚履精誠斯在銘鏤不忘依倚不自於他  
門頂踵知難於報稱謹脩蕪牘上叩興居并達愚衷冀蒙  
鑒納遙瞻几席已心往而形留敬託緘封覺意多而言少  
其為感佩曷既鋪棗冒黷嚴尊伏增戰灼

上李中丞啟

伏以旭日麗旌麾行省統翰藩之寄祥風開棨戟外臺崇岳牧之勲襟帶荆揚長江要衝防遏踞宣潤之上控扼吳楚中原屏蔽填撫通汝潁之郊以清靜寧一涵煦生民部屋窮簷咸食寬平之福以潔廉慎謹表率屬邑銅章墨綬群奉忠信之師布愷澤以旁流播仁風而遐暢百城載咏千里騰歡恭惟老大人憲臺柱石世臣巖廊重望宏材偉畧翕張闔闢具丙魏姚宋之規模碩德遠猷經緯彌綸追韓范富歐之事業孤標峻聳而蓄以深厚望之

慶雲清操刻厲而出以慈祥所至皆作和風  
焯風采焯焯自其俛焉不辭州縣之勞  
稷之重三善四善嘗報最於比年大書特書屢膺薦於  
考政事以詳試而益熟施為以諳練而愈精潁川南陽共傳慈惠溫良之治扶風馮翊更頌廉問澄案之功僚采之所交推 聖明之所重許遂擢居於喉舌有詔徵黃乃留佐夫股肱特請借寇用增秩進律之典慰攀轅卧轍之思譽望益著於中朝聲實彌光於上國爰從監郡即授价藩聿自方州俾專分閩古者並列內職中丞原號雄班今者獨重外除都院尤推劇任唐之節度觀察此為兼官宋之轉運提刑皆同幕屬總一道軍民之務併諸使黜陟之權非重厚無以鎮浮若煩苛適以滋擾自其徊翔既久於閭閻之凌雜細碎無不悉其纖微抑以敷歷偏多於曹掾之喬宇鬼瑣無不盡其曲折不取於鈎校以矜明察而踈節濶目為民畫長久之計莫過於薄斂省刑匪尚夫崖岍以



立聲威而絜領提綱為國固根本之謀必在夫懲貪除虐  
江以東淮以北千里帖然郡有七州有三萬民歡甚功業  
直追蹤於牟杜勛名當接武於夔龍式新巖石之瞻佇俟  
鈞樞之拜澍霖雨而維舟楫滿載旂常補日月而鞏河山  
勒銘鐘鼎卑職羈單下士樸鄙庸儒少誦習於一經僅通  
訓詁長鑽研於六學未克證明歲月蹉跎笑遺餘之不補  
風塵憔悴嗟躑躅以何之獲生聖人之世棧樸菁莪詎自  
廢於長林豐草側聞君子之義南陔白華何敢忘夫夕膳  
晨羞是從初任一資之階漫隨半通五兩之後秩雖同於  
筦庫任有重於監當自顧已卑猶慚未稱幸奉大賢之教  
誨逢坯冶於一陶冀蒙哲人之提携勉馳驅於十駕精誠  
斯在銘鏤不忘即肅謁於門墻早望塵而雅拜將敬聆夫

音指輒敷衽以陳詞伏願德協弼諧功崇啟沃得賢所以  
報國旁招於寬閒寂寞之濱安民本於知人廣延夫耆艾  
魁壘之士育才必由庠序訪廟切之前規經世不以文章  
求根柢之實用採掇無棄於葑菲咨詢且及於芻蕘庶憑  
末光得免大戾蒲柳樗櫟未可供匠石之儲薑桂參苓聊  
以充藥籠之用仰希鑒納不勝兢惶冒黷嚴尊伏增戰灼

上李中丞小啟

恭惟老大人憲臺九州冠冕一代權衡溯道德之淵源全  
三光五岳之氣美辭章之黼黻徧九邱八索之書稜稜風  
采比元禮而不顯其跡矯矯節概追栖筠而自合其宜廓  
文饒之規模加以精密盛伯紀之論議不至濶踈麗藻雄  
辭擬於習之深之殆其似矣高懷雅致况之文靖文定維

其有焉若夫蘇枯弱強秉武岡之節至於奉公潔已著石門之操理寃滯於日知斥桀鷲於景讓是皆今人之未到而亦古者所難兼誰之克如邈矣自遠嘗考駢儷之作半是卮詞亦越頌揚之篇多非實錄茲豈其例未可云然嘗奔走於燕趙之間而得於道路之口又往來於滄瀛之署而按其符檄之文大較以樂易寬和芟除苛細亦越以簡穆恭靜鎮遏糾紛自令長而為監司無此疆彼界之或異由畿甸而歷諸路信耳聞目見之皆同此銘之於金石而無慚即編之於詩書而不愧蓋當隆平熙洽之世必有重厚敦樸之臣維持淳風固護元氣彼清名震世而考其行事不免君子之疑或正色當朝而核其初終莫慰四方之望海內之所以浩然歸重而儒者之所以欣然樂從式觀

衮繡之歸竚俟鈞樞之拜以天下尚有可為之事而國家乃建無窮之基卑職年不後人學未聞道初誦習於服賈未解貫通繼窺尋於歐曾僅能綴緝尚冀歲月之暇橫卷而隨諸生乃以升斗之謀抗顏而居師席祿以為養可竊附於仲車試而教人終貽譏於正叔徒然蠟其貌極知僭踰之愆不無虱其閒難免曠瘵之責蘇湖原為著令當考嘉祐治平之規州郡僅曰具文尚尋滄洲武夷之制教學相長也雖云勉焉而力不足古今何殊乎豈曰願之而時不可仰賴高明之訓督誓竭小己以驅馳為之主持加以風厲譬蘊藏於喬嶽而平岡小阜亦資長育之功如灌注於江河而支川細瀆并獲潤澤之用教化行而風俗厚先布中和樂職之章師道立則善人多更上慶歷聖德之頌

白日草堂存禾 卷二十一  
伏惟鑒賜任冰兢

上李藩臺啟

伏以望高棨戟旬宣崇上國之功譽隆璇台屏翰仰重臣  
之寄控荆襄而振吳會鎮撫統千里之名藩通河淮而帶  
梁陳經營屹一方之巨障表以廉敬銅章墨綬咸謹凜於  
夏日秋霜拊以慈良甕牖繩樞悉布濩於和風甘雨直有  
師保萬民之德豈止慰安一道之功四履騰懽五聯贊喜  
恭惟老大人憲臺挺生賢佐特立真儒萃詩書禮樂之精  
的緒是承淵源上接於周孔負輔弼凝承之望舊典時式  
謨謀遠繼於臯夔稟采豐華黼黻工卿雲之麗洽聞彌覽  
經綸擅賈董之長奧學冠於當時雄文振於前代聳九霄  
而直上橫勁羽於三秋縱六轡以疾馳騁追風於萬里載

從簪筆原自趨墀敷歷曹司翱翔省署英聲特峻左轄右  
轄卓哉二職之華茂實益隆前行後行蔚矣三臺之妙遂  
外分於朝寄聿出綰於郡符惠窮黎以撫綏即奏龔黃之  
異績雄邊防之糾遏并流張趙之威名洵膺褒賞之科合  
五長十連而絕出更用薦辟之典兼轉運觀察以來臨檐  
帷喜暫駐於南州袞繡願無歸於北闕 帝心嘉許特授  
外臺之司 聖眷優崇旋擢行省之任厲潔清之操六條  
澄按盡去夫竒請他比之深文施溥洽之恩七郡集安咸  
喻夫平訟息爭之至意兩江分於上下而治所不移三司  
非有崇卑而事權益進竊考創制之始固全付以總領之  
常迨至沿襲以來遂或分夫節制之柄顧惟臂指之勢在  
今日不殊於前念此綱維之宜獨大賢克舉其職承流宣

化不僅朱墨之勾稽敷政寧人詎止度支之籌算和平寬厚嘗以惇大居明作之先簡穆宏深不以優游取清靜之似正己以率屬奉公砥節競曠義而滂仁奧學以育才易俗移風克耕道而獵德懸中天之景曜宛陵秋浦皆仰無盡之光流大地之恩波皖水漳湖俱被不知之潤即專授於麾節碧油紅旆看周公左召公右之規模佇翊贊於鈞樞紫闥黃扉觀太傅前少傅後之事業卑職羈單下士樸鄙庸儒少涉獵於藝文粗通章句長鑽研於經學莫識門庭悵歲月之蹉跎老兮將至慙功名之蹭蹬窮矣何之乃當一懼一喜之時漫從為養為貧之役假斗升以自給無復當年慷慨許國之初心借縫掖以為郵猶是今者從容授書之本志獲託高賢之門下竊欣小子之幸逢聞宇宙

之大名夙懷企慕樂湖山之自得近識依歸在昔穎昌之了翁辱蒙品目於持國亦越睢陽之明復重增拂拭於希文自顧朽鈍之資冀於坯冶之內倘可加之教誨庶幾奉以周旋尚缺趨承之恭未及望塵而雅拜謹脩蕪牘之敬輒敢敷衽以陳詞伏願霖雨四方陶鎔庶類得賢所以報國搜羅敷抉無毛髮絲粟之不盡其材安民在於知人裁定整齊凡刀筆筐篚之各稱其用養士必由庠序訪剗切之前規經世不以文章求根柢之實學採掇無棄於葑菲咨詢且及於芻蕘得憑末光以免大戾蒲柳樗櫟非足供匠石之儲薑桂參苓或可充藥籠之備仰冀鑒納不勝兢惶冒黷嚴尊伏增戰灼

上李藩臺小啟

恭惟老大人憲臺一代權衡九州冠冕峻元禮之節槩懸  
星漢照耀之光廓文饒之規模挾風雨翁張之氣立標準  
於顧厨俊及異材輩出若羣山之仰岱嵩徧鎔鑄於銅墨  
銀黃衆望咸歸譬百川之趨溟渤文章政事合二科於同  
塗道德功名貫兩端於一轍江以南淮以西物無不得其  
所盡霑灑於厚澤醲膏連有帥州有伯邦其永孚於休競  
鼓舞於和風麗日陳寶五重球琳琬琰燦焉具巖廊之珍  
廣廈萬間柱石棟梁屹然負社稷之重共覩真儒之效益  
增吾道之榮蓋自經義之興多汨沒於章句訓詁抑以科  
舉之弊半消磨於篆刻雕蟲無復經方致遠之宏猷安有  
尊主庇民之實用遂使馳驅奔走別求餘辦之材以致密  
勿經營更屬通達之彥脂韋習以成俗而節義不立其閑

鬼壤幸遇於時而學問不預其品夫惟大雅一雪此言聽  
於下風竊自增氣英資雄畧知湖海之有偉人駿烈豐功  
信科目之得竒士房杜姚宋不專美於貞觀開元韓范富  
歐詎擅名於慶歷嘉祐鋪張大業願寫赤紙青簡之書揚  
厲鴻休更上濃墨大字之頌卑職學未聞道年已後人歷  
攬秦漢以來粗知理亂興衰之故追溯洛閩而上未窺天  
人性命之微拙守區區僅免蹉跌退省默默敢有趨營糞  
歲月之稍閒橫卷而隨章絳之後因升斗之弗給乃抗顏  
而主壇坫之盟在昔庠序之選除原屬興賢育材之至計  
今也州郡之列職僅為索食餬口之私謀學舍荒蕪朋徒  
怠散自嗟卑冗不勝慚惶幸居陶冶之中獲與幘幪之末  
敬因小牘上叩鴻慈倘可加之提携更望進之教督落九

白曰草堂不刊 卷二十一  
霄之珠玉庶奉盛指以周旋奮十駕於康莊得假訓詞以  
風厲希即承於几席願長附於門墻銘鏤不忘精誠斯在  
卑陬而懷遠志固知無補於毫毛束縛而效小忠終冀少  
強於分寸其為感佩罔既鋪菜

上朱臬臺啟

伏以望重繡衣一道肅澄清之烈譽隆蒼珮六條專廉訪  
之權分星史於烏臺凜凜自搖於山嶽巖霜威於丹筆明  
明易避於江河受嘉師而監祥刑聿申敬慎之指陳外事  
而用中罰爰垂矜恤之文小大必以其情或擬之冬日夏  
日出入反非有意盡化為春雨和風高蓋同飛褰帷獨聳  
恭惟老大人憲臺清門碩望名世偉材日月旂常遡簪纓  
於奕葉河山帶礪著閎閱於興朝孜孜於種學績文必求

根柢以濟用循循於經世宰物不為葩采以炫名李贊皇  
之逸氣雄姿於政事自然詳練孔博山之清脩雅望於聲  
華不假交遊早馳騁於長途奔軼絕塵追駿足於萬里久  
翱翔於天路扶搖直上橫勁羽於九霄馭歷為多課奏居  
最百城無出其右三遷猶謂其遲誦美譽之旁流覩英標  
之特起潁川剖竹乘朱轡皂蓋以來臨馮翊分藩合五長  
十連而並建民無遺便縱浩蕩於江湖治不收聲送瀟灑  
之日月 聖心褒許命掌外臺之司 帝眷優崇擢授雄  
班之職上服下服盡心於淺深輕重之間單辭兩辭慎測  
於虛實真偽之辨五職三刺不入重文九篇六章盡刪竒  
請例比極於精密同苻蜀科獄刑號為詳平稱仁漢牘于  
丞相曾為廷尉積德載於高門楊司徒亦列理官餘慶延

於寶篋即看雄旂犀甲擁節旄而同於八伯三公竚俟紫閣黃樞陟端揆而入為三事四輔卑職質本疵賤學則虛庸鹿鹿無竒魚魚何算筮鵠鷺之侶終蹉跎於毫分墮燕雀之羣難躋攀於尺寸爰就升斗之秩用佐滫澠之供官雖已卑職猶未稱經義治事共聞之矣何以復安定之規模小學近思亦具在焉詎能闡紫陽之蘊與幸託大賢之宇下加之教誨庶可奉以周旋冀分君子之末光為之主持得以免於墜失伏願勲高虞牧榮晉周卿弘廣廈之萬閒相彼四方盡在幘幪之內轉洪鈞於一氣厥惟三品咸入坯冶之中收竒寶於道旁尋芳草於野徑則執斤引斧左右效樸斲之工抑奉蓋授綏遠近助鞭策之用即親承於几席希長附於門墻感分歸誠慶遭逢之多幸依仁佩

德頌高厚於無疆冒黷嚴尊可勝戰越

上朱臬臺小啟

恭惟老大人憲臺器諳宏遠風采浚明茹古涵今博洽推賈董之傳匹懷文抱質弘深居歐范之等倫磨礪於珪璧琮璜欽四璉六瑚之寶雕斲於榱桷杞梓適大采小楠之宜乃以明通敏達之材施慈惠溫良之政表禎苻於祥鸞馴雉播德化於雅管風琴長仰慶霄蔀屋窮簷欣末光之照矚旁流閩澤大川深谷藉餘潤之沾濡歲月遷除爰近擢於監郡藩屏委寄更特命於祥刑多所平反務在生之一奉湯網禹車之至意願為省釋不能徧也更刪漢律唐令之繁文以審錄之餘而不廢咏歌遠擅場於大歷以判決之隙而別為題署創新樣於元和牛渚龍崖籠一時

之勝概宛陵秋浦挹千古之風流世多尚夫通材而容納夫樸拙鯁直之士人皆競於進取而搜剔於枯槁沉溺之中佇晉陟於鈞樞當使駟騶同歸於駕馭行冊命於師保抑令金鐵銀鏤盡入於陶鎔卑職學術多踈行能無取紛尋摘於章句不解包何長涉獵於藝文敢希富駱隨行逐隊曾未離於風塵隱奧伏閒竊自甘於退處幸生聖人之世菁莪棫樸豈自棄於豐草長林側聞君子之風南陔白華敢或忘夫晨羞夕膳詎云效其尺寸姑相從於斗升自學制之久廢於今師道之不復於古盡倚席而不講音重拙以何為甚愧虛庸無以率其怠散更嗟冗末何以予之登齊惟小子之幸逢辱大賢之是託申風厲之令膠庠有戶稟承廣樂育之方朋徒有所依倚則淬磨朽鈍長增拂拭之方鞭策疲駑薄効馳驅之用其為感佩罔既鋪菜

上張太尊啟

伏以皂蓋彤襜千里分旬宣之寄隼旗熊軾一圻重綏理之權布麗采於中天景星慶雲咸仰照矚流濃膏於大地和風甘雨悉被沾濡維茲桐君皖伯之邦獲見京兆漁陽之治表周官之廉正錄漢傳以循良郝鄙得其依歸章縫有所準式酌樽壘之餘液徧賜於一遂三郊叶笙磬之同音起化於東序西序五聯贊喜四履騰歡蒸惟老公祖大人憲臺道德菁華文章淵海溯橫渠之舊學源流自濂洛以來挹曲江之遺風手筆並燕許而上明經術以濟世務元元本本直窺禹稷之真傳抒諷諭而達下情炳炳烺烺



并削揚馬之賸語合規模於作者求根柢於古人沉深稱  
厚重之儒國家是賴慷慨負雄傑之氣英俊所宗試百里  
而剖符比三年而報最鴻恩博洽愷澤滂流屬潔清之操  
處脂膏而不以捲握自潤施慈惠之政懸蒲葦而豈以鞭  
扑必行我德如風轉移有同於偃草臣心似水扶持亦比  
於載舟遂膺賞擢之科用錫褒揚之典在銓管之常調再  
命作牧於方州蒙 聖明之深知一麾出守於大郡皖口  
舊為重鎮同安今號雄藩遠控荆襄遙通汝洛雖昇平不  
言形勝而撫馭必得名賢中朝之所推崇 聖心之所嘉  
許洵受親民之職偉哉著績於前熟識制治之宜允矣課  
效於後長川鉅谷地大而益廣其施烈日嚴霜歲久尚彌  
厲其節纖悉細碎盡知之矣自不遺於燭隱照微險阻艱

難備嘗之乎又何憂於恕己量物無匹夫匹婦之不獲其  
所即一草一木之皆得其宜且也慕徐穉之高風於焉懸  
榻更爾思任棠之微旨不避當門拔素行以化囂浮其運  
旋在薄書期會之外集眾思以廣忠益所採掇豈農穀錢  
刀之常問里歡呼數百年欣逢此日父老歌詠十四道僅  
見斯才州郡不足以相煩社稷當付之大任琮璜珪璧必  
為巖廊之珍杞梓榘楠要是棟梁之器即看碧油紅旆日  
夕陟藩垣屏翰之司佇俟紫閣黃扉朝野頌輔弼凝承之  
績卑職末傳樸學下里輕材漫涉四部七畧之津涯莫測  
九流六家之閩奧性惟拙直落落不合於時用則濶踈斤  
斤徒守於己念許國之義詎自棄於明時緣將母之思僅  
相從於卑署嘗考北宋著令之始校文講藝非盡興賢育

才之初心亦越勝國改法以來增秩立員僅為索食糊口之私計自傷冗末不勝慚惶幸託庇於高賢望門牆而趨走猥廁名於下吏奉訓誨以周旋若潁川之了翁蒙品目於持國似睢陽之明復增拂拭於希文自顧遲頓之姿惟冀受容而受察獲處曠閒之地敢祈或挽而或推倘可加之提携庶克脩夫職業陳書橫篋復覩槐市之開舉論發題重正露門之講伏願陶鎔庶類雕琢羣材本三德以乂民盡方員平直之用廣十科以造士無毛髮絲粟之遺今者預蓄之膠庠之中異日徧置之廟堂之上則垂聲史冊不徒比於文翁常袞之倫而附名簡編亦可比於趙德杜醇之次敬脩蕪牘輒致愚衷即晉謁於崇階冀常依於末席伏惟鑒納可勝冰兢

上張太尊小啟

恭惟老公祖大人憲臺名世挺生異材閒出具橫浦之節槩懸星漢照耀之光廓垂崖之規模挾風雨翕張之氣安世默識河東補三篋之書平子精思西都成十年之賦兆玉符之瑞紀布濩於萍鄉表紫文之儀羨榮華於珂里廷空稽牒共推明斷之材野絕情農是識勤敏之用安陵重望籌策同姚宋之儔廣漢高名議論皆朱呂之亞詎止當時之能吏實為一代之偉人蓋嘗伏草茅之中竊妄計家國之事宣風布職無如二千石之良作牧分藩率在四五輩以下莫問夫政平訟理庸冀乎遠格邇安茲於今日為第一流考之天下更無異議昔以少忤衆其懼矣悼小人之疇依迨其既留羣共驩焉樂君子之得位當此重熙累

洽之日又值搜竒拔異之時自一歲其屢遷乃五年之尚  
滯念蒼生之誰托不計夫凌雨震風慨人物之眇然竟忘  
夫滋蘭樹蕙雖斯世斯民之幸或由九里而及京師豈吾  
君吾相之心先一州而後天下佇看珪覲式俟璽褒大旆  
高牙郇召慰黍苗之望鸞臺鳳閣伊傳著綸綍之勲卑職  
學未通經才非適用講考亭之集註詎窺道德性命之微  
誦涑水之編年少識理亂興衰之故歲月逝矣甘蕩落以  
無成晨昏缺焉懼滄漚之弗給爰隨遠牒用注末階維小  
子之幸逢託大賢之門下近在坯冶之中得為屬吏曩緣  
葭莩之誼敢附通家已忻荷夫帡幪更望加之教誨集橋  
門之彥選士造士咸鼓篋而橫經盛黌舍之儀小胥大胥  
孰負牆而倚席表風聲以樹扶道教願承緒論闢鹿洞之  
規條張壇坫以主盟儒宗因依末光繼石室之圖繪其為  
忻幸罔旣鋪菜過此以還未知所措

答羅年兄啟

卓犖偉材淵源奧學返三千餘歲之古有過向雄繼八十  
一家之竒不數崔蔡博聞辨智合居言語侍從之流簡要  
清通當在臺省寺監之右乃六月之暫息預培搏風九萬  
里之程會一舉之先鳴竚入登瀛十八人之選允為時棟  
共仰高標弟樸鄙庸儒羈單下士猥緣同譜得與齊盟豈  
臭味之差池顧道途之隔別山川相望風雨銘心偶脫蓬  
坑來居學署投閒置散詎有負於生平興賢育才尚自慚  
於職任幸依桂林之里快覩儀刑遙瞻通德之門尚圖造  
謁冀承清誨光分餘壁之輝遽辱好詞炳似慶霄之照奈

白曰草堂不禾 卷二十一  
尺寸之莫致已貽笑於濶踈何賤素之未遑更祈容夫遲  
頓以積時之拘滯惟空羨夫高鳥遊魚倘獻歲之惠臨可  
相從於桃蹊李徑敬因蕪牘聊致愚衷言少意多終難寫  
夫懷抱形留心往已不禁其驅馳輒自占陳不勝傾嚮伏  
惟崇鑒曷任翹企

與諸學公啟

清門雅望名世儒宗宋艷班香疏古文之派別周情孔思  
溯正學之淵源廣樂育於棧樸菁莪大收榱桷棟梁之用  
蒸髦士於金玉追琢旁羅琮璜珪璧之珍文教聿新咸橫  
經而捧手士風丕振多負笈以從遊鵠既集於泮林鳳宜  
巢於阿閣佇由芹水徑上蓬山懋竝猥以散林謬聯同事  
慚虛庸之莫稱重分半璧之輝愧沿沂以無徒願借九里  
之潤道途之阻未及親承夫光儀歲月匪遙即擬躬聆夫  
訓誨茲緣公務率通啟陳所有微情具於別紙伏惟鑒照  
不勝翹企

與丁司訓啟

延德忱恂負材敏碩風規傑立蔚矣儒者之華節槩著聞  
卓哉古人之望是則是效坐都講而來三鱣左之右之引  
長途而騁兩驥士皆丕變用收拾榱桷之材道乃大同爰  
淬磨琮璜之器橫經捧手者數百輩咸觀聽於橋門請業  
摳衣者幾千人爭問難於重席有詔定太學之法湖州獨  
取翼之在朝舉博士之師平原自來匡鼎泮林芹水羣推  
陶冶之功蓬島瀛洲竚看飛騰之勢懋竝學之世用識不  
逮人謬以庸材獲叨聯事同舟而濟假維楫於中流一車

以行整鞭轡於前路方深望夫教益遽辱蒙於注存价使  
來臨瑤箋是况木瓜為好也媿無雜佩之酬干旄以告之  
竊冀周行之示即遲良晤不盡寸言臨啟曷勝翹企

安慶府學月課告示

安慶江淮隩區荆吳都會昔稱南嶽聳翠律於潛山近帶  
西溪阻渺瀾於皖水攬雲巖雪嶺之勝靈秀所鍾通桐川  
梅渚之波粹精斯滙緬懷往蹟東坡山谷勝槩猶存遙溯  
前徽廣平勉齋淵源未遠欽清風於晉宋杜行齊何萬倫  
推高尚之宗考積學於元明王龍舒方本庵負儒林之望  
至於杏園桂苑雕華散彩侈烜赫於科名若夫紫閣黃扉  
持軸秉鈞紀寵榮於闕閱簪纓過於韓呂中原文獻之家  
聲譽並於歐曾天下英才之選流風所扇人人抱荆玉隨

珠餘韻相沿在在擅南金東箭是可希施孟嚴顏之亞將  
復見晁董賈馬之儔本學稟質迂踈受材樸陋六經四子  
厘能涉其津涯九流十家未克窮其奧曠方冀歲月之暇  
橫卷而効編摩猥就升斗之謀抗顏而從駕說竊念古者  
膠庠之設原為興賢育才之盛心乃觀今也郡縣之除惟  
存課藝校文之故事自慚卑冗曷敢怠遑胡安定徐節孝  
之模範可師許蘇門吳草廬之科條具在少獲廁遊於前  
輩廩廩乎與聞古君子之風晚託末契於後生嚶嚶然塵  
迷一先生之語豈無千人萬人之傑願比肩接踵以偕來  
誰為一箇半箇之傳顧高瞻遠望而何極驪黃牝牡盡登  
閑廐敢云相士如相馬之奇平直方圓悉就冶鎔庶幾鑄  
金得鑄人之術謂文者道之所貫當沿流而泝其源然言

白曰草堂存和 卷二十一  
者心之所形可即末而操其本詩賦策論較焉殊轍匪徒  
矜黼藻之工經義治事合為一塗必欲濟根柢之實鑽穴  
於微言奧指居今稽古乃克就槩獲之所同刊削於碎義  
偏辭崇雅黜浮其毋背繩墨而改作典刑已邈遠尋之三  
十載以前英髦咸資庶不至四五輩以下地連汝潁風氣  
重固常想中州之出偉人俗異江蘇學術樸醇深慰南方  
之得北士爰諏令日用集名流植芳卉於堦庭不啻珍之  
席上收竒寶於篋櫝莫容置之道傍報國惟以文章蔚矣  
太室瑚璉之器識時在於俊傑卓哉明堂梁棟之材本學  
才闕三長愚存一得專農馬之智滂云甲乙品題供藥石  
之儲竊比朱丹磨研非更繡其鞶輓假課試為講習之媒  
思同附於門墻引章縫以康莊之路愧范魯公之衣鉢安

望登庸援歐陽子之鼓旗亦能助勇傾耳以聽黃鐘大呂  
倡九變之和聲拭目以覩景星慶雲煥層霄之麗采屆期  
擁篲佇俟鳴鑣相與有成眷言無斁須至示者

頒朱子書謝 恩呈看詳

看得唐虞夏商而後道在東周禹湯文武以來學宗孔子  
顏曾翼其緒思孟承其傳自大義之攸垂遂微言之幾絕  
秦用申韓而道以裂漢尊黃老而儒寢衰六經皆殘缺之  
餘諸子多分離之論廔守章句訓詁之業用紀王鄭賈服  
之名迨濂洛之學既興而洙泗之道乃著關中本原則一  
比於伊尹伯夷龜山的緒是承同於卜商言偃定夫顯道  
其末已分豫章延平其傳未顯惟我文公之出始集諸儒  
之成窮理致知極庶物人倫之幽蹟正心誠意凜戒慎恐

懼於幾微為六藝之折衷詩書易禮之旨大明煌煌乎如  
日月之經天江河之行地立萬世之標準語孟學庸之註  
既定鑿鑿乎如藥石之可以伐病五穀之可以療飢剖從  
來不決之疑訛發自昔未宣之蘊秘疏奏封事莫非帝典  
王謨之精敘記碑銘亦皆天理民彝之奧象山以虛無為  
捷徑力攻其溺於釋老之非同父以功利分岐途大破其  
流於管商之失發揮所及殘篇斷簡俱布帛菽粟之文風  
指所傳隻字單辭若天球河圖之重論其道實孔子以後  
一人比其功亦生民以來未有乃刪脩纂輯之作具有成  
書而文章議論之垂未曾裁定全集別集續集之不無煩  
雜池錄饒錄建錄之或有混淆詮次者博采廣搜而未考  
其前後編次者件分條繫而未辨其異同閒入他文且增

贅語勉齋果齋之承學誰能不負其傳西山鶴山之勃興  
亦祇無失其舊因循既久散軼莫釐至於四書之訓說最  
多尤生平精力所寄而諸家之抄撰不一乃後世學術所  
關集編止於學庸略而未備纂疏及於陳蔡擇焉不詳雲  
峰之通頗為紛舛道川之釋未極刪除彼何王金許之云  
尚疑醇醜之異味况胡楊蕭陳之輩何止黑白之殊觀制  
雖重於膠庠說或同於燕郢致使外伺者得窺閒隙並令  
墨守者轉見瑕疵橫肆舐排公行刪削譏摸索之影響誚  
辨析以支離考亭之書幾為厲禁尼山之旨別入旁門幸  
否泰之循環斯晦明之遞轉我 皇上欽崇正學表章真  
儒溯道統之源流爰升從祀滙群言之條貫俾纂全書學  
惟定於一尊理同歸於皆是黜德性問學調停之私說敢

云朱陸之金稱斤冰炭輔車謬悠之狂言誰曰中晚之異論謂六經之道皆可見之躬行而四子之書尤為切於日用校勘已徧頒布宜先學並進於知行佩博文約禮之訓德同脩於仁義收存心養性之功齊治均平誠為樞紐中和位育敬屬始終統會辨論之詞而黃輔諸儒亦可不入別擇發明之要而饒胡以下豈所宜參反復丁寧若傾耳於鵝湖鹿洞之側裁成激厲直置身於武夷滄洲之中是則震八表以鐘鏞懸九霄之星漢五百年淵源可接導河積石流行於徐揚雍豫之區億萬載聲教無窮維嶽崧高竦峙於元會運世之內矣

為顏先生請同門啟

顏先生以鴻博之才丁難阨之運世傳一經不蒙稽古之

力家徒四壁曾無卒歲之儲乃心織而舌耕竟囊空而室罄曠懷雅度溫溫然陳仲弓鍾季明之風邈志孤情凜凜乎胡元安袁邵公之節唯知謹以自守不肯少以干人寂寞闕君平之稱流離起孝標之嘆耄而被疾已無望於杖國杖朝養則無資又何有於時制月制總計終始之具安取六檟之材深慮朝夕之閒或致兩楹之夢嗟蓬蒿之已僻邱子之宅誰分慨扶服之無聞陸氏之莊安在懋竝等咸從幼學久立師門彭戴異傳各有自得嚴顏同派俱已顯家原無拔十之求敢忘在三之義逾時歷歲未少答於絲毫刻骨鏤心空抱慙於頂踵小人有願謂日月之尚賒君子曰終知報酬於何所今當窘迫之會亟為將伯之呼凡我同儕共襄茲舉桓榮負土遂崇若堂之對楊政持章



且乞尺一之詔厚有賴於二三子抑無事於百千緡巨榦  
洪支措置彷彿川之例輕塵絕露辦營此曲逆之來奚啻  
三塗之艱竊敢九頓以請謹啟

為姚氏請助啟

姚曉老以英偉之材丁荼毒之運橫罹酷害真可痛悼幸  
蒙公明之聽得伸幽沉之寃凡我同人皆為感泣而案牘  
未竟歲月方長煢煢孤嫠崎嶇奔走道路之費無所仰給  
仇讐已報縱九死其何辭依倚無門幾寸步之莫致望深  
同患慮重分憂願分東壁之光少助西江之潤向也陷胸  
決脰共知人有奮心今者倒廩傾困更冀克襄義舉謹啟

白田草堂存稿卷之二十終

孫男希朱校字

白田草堂存稿卷之二十一

寶應王懋竑予中甫著

詩

春二月夜中書懷 丁卯

乾坤吾父母一身詎為小浩氣塞太虛迴出蒼霞表云何  
當世士如眠夜不曉顛倒衣食裏游絲自膠擾諸葛志如  
龍正學白日皦舉頭茫四顧嘆息斯人少嗟予德菲薄况  
又集辛蓼增益頗不能疾疢苦未了汨沒二十年慚愧辟  
有標竊讀古人書劇怵窮幽杳憤極鬼神通曠若矇而瞭  
洛閩世已濶墜緒誰與紹吾生雖云晚自待肯膺眇高志  
薄雲天一往頭不掉春風何融融明月何皎皎白鶴翔天  
末遊魚沒深沼人生誠自得胡為利名擾操刀便一割行

白田草堂存稿 卷二十一  
之在所肇勗哉若不及流光同過鳥丹崖峭萬仞毋使後  
世藐千秋放志意慷慨稱燕趙

書曰詩言志太史公曰詩以道性情余夙不工吟率懷  
而作或有合焉月露風雲之詞所不屑也然自顧不諧  
於世故未嘗以示人陶隱居所謂只可自怡悅者也使  
今時名人見之未免笑吾僂父耳近日人心不正邪說  
橫行後生子弟類皆索索無氣靡靡無骨廉恥二字漸  
滅已盡滔滔者皆奴妾耳豈有丈夫哉吾輩涉世日深  
漸生蔓藤如繩之繞如泥之淖不能自脫須勇猛振起  
精神挺豎着脊梁骨白戰將去庶有出頭日子雖被謗  
議不顧也屈大夫曰寧溘死以流亡兮余不忍為此態  
也又曰雖體解吾猶未變兮豈余心之可懲古人不作

此耿耿者常往來於天地間余何人者高山仰止景行  
行止能無心哉朱子曰世衰道微人欲橫行非剛勁有  
意氣人立脚不住近自檢點大率委蛇處多勁烈處少  
浮湛鄉里絕無圭角恐遂汨沒不復振起為世笑罵中  
夜思之不知其汗之浹背也劉越石云如何百鍊剛化  
為繞指柔要其所以化者必有其根必須斬斷此根纔  
可長進不然只是空說不濟事也

偶閱陶集移居詩於其語忻然有會也因和韻二首

贈念堂先生 壬申

我本避世人志不在田宅常持一卷書澹然風雨夕素心  
託喬子竊忻得為役邇者更比隣時時共講席放意薄雲  
霄冥搜追古昔願為雲與龍相逐無分析

空齋索莫坐細讀古人詩古人不可見悠悠安所之徘徊  
步中庭恍惚若有思千載日以遠為問此何時柏馬計得  
失深意良在茲不從多嘆息斯言不余欺

即事

小小中門限日日常在眼一朝忽增高出入不及簡舉足  
若有絆旁觀盡為莞從此下心意未到已長轡咄嗟復蹉  
跌慚愧色赧赧高下何得失一視初所撰自古有賢愚由  
來豈異產少成不可變慎之銘心版

寄念堂先生

癸酉

童稚由來並頡頏拚飛南北西茫茫三千里外誰為樂十  
二時中不暫忘野水橫流歸斷港寒風長吹挂殘陽年年  
桃李爭春色何日征車到帝鄉

好似微之與樂天當時意氣更無前勝軍十萬橫矛戟巧  
匠三年細斲鏘慷慨不須同富貴箴規豈塵在文篇幽懷  
無限憑誰說一度思君一惘然

知己一人可不恨文章何必問遭逢徒然過眼終無益如  
此糊心孰可容彈事鮑宣真峭直授經張禹更中庸野人  
會著遵堯錄寂寞書齋手自封

念堂京兆秋  
試薦而不售

牢落生涯似轉蓬漫將身世付夢夢高枝厭泥三霄露別  
葉飄零五夜風傲骨不辭與俗忤短材合得一生窮故人  
問我今何事已作牆東避世翁

欹斜幾幅寫離憂惆悵無聊暮倚樓萬里風煙雲似蓋滿  
天星斗月如鈎寓書無復誇三秦偶詠應知擬四愁寄語  
洛京今好在雙魚時至更相酬

鳴鴈行 甲戌

鴻鴈燕山來飛渡黃河北苦飢常悲鳴聞弦遠自匿厲翮  
摩蒼穹儵忽誰能識江南沃饒地稻粱何翼翼側目伺山  
隙呼朋共飽食來去如風雨朝暮得不息十連五五羅  
列生光輝笑謂此閒樂那肯更思歸春風不相待流光倏  
爾非俛仰難可住躋躅江南路體肥不受風空復怨毛羽  
恐遂罹蔚羅慄慄自戰懼淮陰少年見之笑昔者何黠今  
何愚胡不高舉翀天去徒爾一一口啣蘆翻身挾弓仰射  
笑箭來不得少須臾一鴈旣墮地衆鴈驚相呼努力忠遁  
逃咄嗟復與俱千百不脫一念之良可吁豈真智愚別直  
為苦樂殊

舊交行

洛陽城中花如雪遊人三五爭攀折秋風不待結子成啼  
鴟一鳴芳暗歇少年盛氣寡朋儔翱翔駿服齊駟鐵有不  
吾如若泥滓黃鵠高飛在喘噪接軫連茵袞袞來若作酒  
醴惟麴蘖蹉跎未老身已衰面目冷落言詞拙古釵雕刻  
非今時手持贈人人不悅世閒百物有輕重眼前如惡誰  
能別不如閉門且高枕三徑榛莽人跡絕只今鑄錯已嫌  
遲何處却覓六州鐵

題讀書劄記後 乙亥

絳雲樓上說瞿曇萬卷詩書合自慙元祐全人誰得似天  
遺一老在江南  
雜橐於今總莫傳殘書兩帙是遺編箇中別有關心處不  
著長楊著太元

高元未比陳公甫篤實應同薛敬軒記取昔人珍重意盡  
刪枝葉泝根原

肯將綺語費精神密證微叅幾十春此學而今真斷絕不  
能容易屬他人

和鹿沙自題二安書屋 丙子

萬事而今絕辦營一枝聊爾寄東楹入門曲折風無力當  
牖周遮月小明漠漠殘香雨露迴稜稜立壁雪霜清誰云  
身外無多地笑傲還堪足此生

半弓只許能容膝陸處依然住小舟不解何為空過夏更  
無一事恰逢秋閒吟漫喜書堆案散步常防屋打頭料得  
此中安穩坐春風春雨聽鳴鳩

磊落床頭一劍橫那堪閒作老書生杜門並不開三徑浪

跡終當徧九坑問卜只緣愁混濁登車何日想澄清近來

自笑吾非我付與兒曹說重輕

少小與君最往還文章氣誼早窺班未聞牛驥常同阜豈  
有蛟龍肯戀山四海於今誰不識是中能得幾時閒屈伸  
定理惟看蠖萬種愁心一併刪

遊惠山憇品泉亭和鐵上人韻 丁丑

蒼山挿近郭到此意適然陟巘頻迴首臨池小息肩槎枒  
攀古木清冷吸名泉賸有山居願探尋莫計年

過寄暢園和鐵上人韻

名園此日好勝境更誰同苔繞亭亭樹歌催細細風蒸嵐  
屯野碧破萼點梢紅向晚添幽興淹留意未窮

贈鐵上人用前韻二首

漫爾相逢日襟期共灑然世人多貴耳誰氏可差肩  
萃律歌危壁琮瑤響暗泉論文重有約握手在今年  
未省西方教師今獨不同清心懸凍月逸韻澹流風  
瑤樹旋吹白珠苞乍坼紅高談連日夕此別意何窮

又疊前韻二首答鐵上人

獨住香林寺高齋思渺然煙雲長在眼風月一擔肩  
野鹿頻窺戶空山自煮泉此閒應可樂端坐數流年  
鐵上人住焦山喬子曾來此嗟余未及同倒懸滄海日橫吹大江風  
石路嫌拳跼山花鬪白紅斯遊亦未遂豈獨嘆途窮

舟中感懷敬和叔父樓邨公韻本四首缺一

撲面飄風起逢迎却小槎鶯花歸夢數驛路客愁賒  
感浪翻孤月砒崖舞急沙白雲層疊處遙指是吾家

勝地排芳樹晴光鎖綠筠低迷山寺路高挹太湖濱  
偏覺寒隨客常思睡過春寂寥無限意有愧草元人  
去歲秋風裏還家暮雨昏驚波浮斷岫橫檝過高原  
青鳥誰通使黃熊未割恩今朝誰過此嘆息舊潮痕

三月初余歸寶應園中牡丹未放及余以又三月重  
來則花已殘矣感賦四絕句

薄陰輕響弄芳辰去住匆匆笑此身今日偶從花下過  
驚心已是十分春

纂纂香苞翠裏勻歸來別作一番新紛紜眼底真無賴  
只趁春風不待人

蜂喧蝶亂不禁思國色天香借一枝窮蹇應知原有例  
却愁與汝不相宜

白曰草堂存稿 卷二十一  
欄不厭百回看  
闌風長雨送春殘寂寞高齋作意寒惆悵明朝春欲盡憑

側聞高論迴自省忽茫然列坐嗟箱口寒宵笑聳肩徒云  
工篆刻只是負林泉始覺平生誤蹉跎歷歲年  
薄材敢自棄願與古人同清冷三霄露蒼茫萬里風任教  
嘲曳白未肯拾殘紅竟夕何曾寐推馱兩字窮

梁溪郭外泛舟

戊寅

料峭西風氣肅清宿雲解駁快初晴青鞋布韞從今始桂  
權蘭橈試一行丹嶂千重思正遠碧天萬里意空橫眼前  
大有娛情處多少溪山管送迎

亂流孤峙自成竒匝地濃陰接綠漪遠寺閒看四面水倚  
欄細數一枰棋摩娑古石尋遺跡追逐涼風入舊祠落日  
放船應自好篙師解纜更頻移  
山色雲容澹未收斜陽返照入中洲蒼蒼暮景千峰合渺  
渺長空一水浮身似征鴻無定所心如巢燕只歸休秋風  
不用頻搔首八月江頭一葉舟

贈胡敬仲

世味蕭然總破除焚香宴坐自深居縱橫獨有千鈞筆搜  
獵長隨一卷書野鶴摩空雲澹澹寒梅斜影月踈踈逸情  
高韻無能似媿我麤中百不如

湖州舊學淵源遠內院遺編統緒長開卷恰於心有得閉  
門都與世相忘咀嚙不肯逞言語篤實誰當論輩行我亦  
曾聞伊洛吉鵝湖鹿洞好商量

客舍感懷以旅食法當瘦遠行人所愁為韻

天風吹遊絲飛颺向何許出門多棄捐流光感羈旅我心  
如秋砧日夕千萬杵空堂時歎息鬱鬱欲誰語

豈無桐可棲豈無竹可食嗟彼鸞鳳姿而乃在枳棘願借  
南山霧冥昏共一色泛泛同舟子何須辨白黑

愁思日以侵有如萬鈞壓微茫方寸閒固守坐牢甲戰勝  
癯者肥根株付一錘究觀聖門中此是安樂法

空庭獨延佇天高日正長豐悴忽去來得失安所當竒文  
窺楚屈妙理析蒙莊生平宿習在結念不曾忘

膏以火自煎山以木自剋輦輓刺繡文擾擾與心鬪我本  
澹漠人坐此日羸瘦願尋第一義小道何足究

晨昏三十年左右奉中壺胡為饑驅人離家日以遠望望

白雲飛三起不能飯尚哉王子陽迴車九折阪

支床有病婦掉臂忽遠行丈夫志四方豈無兒女情何因  
銷疾疾醫藥漫縱橫家書不易到苦樂那能明

世道離淳古澆風散其真兩兒初長成未知學何人醇謹  
舊家法正直我所珍此言能信否遠寄使書紳

江漢水之大其別為灘澹賦分有定爾窮愁固其所生無  
媚人骨與世日齟齬橘柚有佳味肯復戀粃粃

丁與壬為妃坎與離為仇相反乃相成此是天意不自顧  
終無補歲月忽已邁閉門讀書史已矣余何求

夏夜感懷和敬仲韻

涼風已是片時秋牢落清居意轉幽熠燿小星穿樹出空  
明積水接天流壯懷誰與銷深夜高詠應知釀別愁吾道



非耶還自笑合將身世付悠悠

玩月用前韻

肅肅輕寒五月秋橫斜踈影更清幽波浮碧瓦翻無定光  
射銀河斷不流未解題詩猶有恨慣經作客已無愁霓裳  
自是人間曲碧海青天只謬悠

書座右二首

已卯

長堤潰蟻穴君子慎其微生平操持力不敵一念非波浪  
浮天濶漭漭決四圍內省增歎息已往安可追  
奔馬不可馭盤石不可幹是非反掌閒鉉刀貴一割我心  
似寒灰百念俱刊剝願更塞其端絕之在由枿

偶作

拙守何能有巧逢漫從季主卜窮通已無萬里封侯相更

直一生磨蝎宮冷淡自甘時輩棄清高未與昔人同出門  
一笑吾何事老放江湖號病翁

憔悴應知力不任行年已見一毛侵長風大浪平生志白  
石清泉此日心世事煙雲歸變滅閒中歲月足幽尋空齋  
大有遺編在時聽朱絃太古音

蓮池菴舊有三教堂張明府毀之作詩示邑人因次

其韻

庚辰

倥侗顛蒙迷黑白異教舛馳爭相逐詭辭誕章滋糾紛茫  
茫歧途竟安適祇園高坐張網羅頗疑世人嗔怪僻金銀  
銅鐵歸大冶左右採拾工塗澤漫云三教共一源入門曾  
不辨主客珠裝寶飾例從同遼濶千年雲霧積吐哉小儒  
爭淺膚證引䟽通害愈劇崛起韓歐有幾人庸庸餘子其

誰責我公遠紹兩賢後一憤今將付火宅神靈萬古塞太  
空顧此旃檀豈遺迹是非剖判直分明附離何有豪髮益  
西遊乘日亦虛荒位置原不棄履屐不論不議古之典只  
用彼法題之額長歌激烈敘其由勁氣方當沮金石願持  
此詩曉群愚門闥洞開我心獲

讀詩疏辛巳

一經穿穴舊家風地老天荒閉戶中細注蟲魚銷假日不  
須辛苦學屠龍

人日用退之城南登高韻和念堂癸未

獻歲會佳節曉日和風弄端居茅屋下兀兀如癡凍簡編  
信有味佚遊戒無用古人不可作執鞭吾誰從炯炯一寸  
心直與千載共剝啄叩門來衣冠強迎送念當遠遁去伏

隩躬種蒔不爾乘孤舟萬里快一縱丈夫各有志胡為妄  
倥傯寄語同心者寸陰宜自重

燕堂諸公俱有作復繼其後

嘉會雜羣朋乘酣恣嘲弄賈勇各摧鋒剖疑若滌凍而我  
朽鈍姿不中一割用喬子發高唱搜剔徧遊從瑤函滿琳  
琅願與拙者共固距不容爾牽引已疊送煎爇迫詩腸石  
田燠菰葑又如行蜀坂束馬不可縱文章一小技顧乃徒  
倥傯執筆祇自笑累句詎宜重

病中題留侯世家後

老向赤松傳寶訣穀城黃石轉荒茫素書一帙分明在檢  
點曾無却病方

高沙寓齋獨坐偶憶江南之遊因成長句二首丙戌

旅寓應無外物牽高齋趺坐思悠然荒寒恰與秋天迥寥  
寂還於靜者便漫笑此生如寄爾都忘今日是何年朝來  
飽飯無餘事手把南華第一篇

從來性癖耽肥遯一室蕭疎夙所甘壯志何須馳薊北幽  
懷忽自憶江南清風十里吹黃葉紅稻千塍落翠嵐遙念  
昔遊佳絕處孤峯頂畔小茆菴

戲作示同學 丁亥

諸君才調各縱橫前輩風流見典刑乍看異軍驚特起却  
輸一着占先鳴同時謾說河南簡晚節翻傳少府平鈍拙  
無能偷格律廿年雕琢竟何成

贈相士 戊子

東西南北只橫飛倏忽空行絕馬鞿默坐畫爐原偶爾莫

將姑布認麻衣

遷延何望九方臯駑馬應無驥一毛邂逅逢君惟淡話蕭  
蕭小院滿蓬蒿

題海陵武使君相馬圖 庚寅

長松千尺倚絕壁寒風謾謾來西極細草平沙萬里遙驪  
裹遠自渥洼側使君疑立少踟蹰中有至意人未識前身  
應是九方數驪黃牝牡同物色鳳膺虎脊擅竒姿飛電流  
雲自超特容與蕭散脫羈鞅錦韉珠鞍詎外飾應策騰空  
須臾爾個儻未可尋常測周遊黃澤轉璿臺弭轡更就芝  
田食金埒未解重驂騶蟻封安用資刷拭神駿之愛愛者  
誰口不能言寫以臆使君意氣萬人豪逸情遠性無畛域  
牧民會須去亂群周旋後先利啣勒更加按節鳴和鸞惠

養不欲窮其力舊德曾聞司隸驄治譜一一遵軌軾屏藩  
今日正須才左驂右服此其職他年祭戟重旬宣千金市  
骨意尤亟大厦可成非楠棖衮衣云補豈要褫駕馭鞭策  
効驅馳一過馬群空冀北考牧攻駒例久傳汧渭華陽數  
盈億十里五里白汗流什伯之中焉取仇太行朝邑憔悴  
時筋骨形容皆自匿一經品題價十倍先景遺風信可得  
使君著意風塵外為撫此圖三太息在垆伏櫪俱長鳴不  
須更鑄銅馬式

贈攝高郵令胡秀標

崑崙之水來自北淮泗從之相左右洪濤瀾汗渺無際顛  
風急雨常奔吼淮揚兩郡為澤國萬民流冗嗟四走安集  
撫綏賴良吏古之冀黃誰其偶胡侯崛起遼水上胸中磊

落羅星斗前年曾攝安宜宰閔閔勤恤不務咎恩膏布獲  
雨露施覆育所及徧敷穀以德化民民不欺中庭不用陳  
鞭杻綱紀小大事咸宜綜練精詳卯及酉盡絕請謁屏苞  
苴一介分明義不苟飄飄高舉振六翮直以脂膏為汙垢  
歸裝不留一錢看惟餘德澤在人口去冬忽聞孟城來鼓  
舞歡喜連童叟兩界相爭幾不決佇立南望空搔首我侯  
視事載一期惠政清操如素守瀕洞適逢災沴餘賑窮恤  
乏行所部搜剔窮鄉一不遺人人親自給筭數紀德敘功  
滿里閭投以木桃報瓊玖天門鷓鷲忽群飛紛紛符檄來  
如藪一手枝柱與上下屈心抑志常忍詢激灑珠湖浪不  
驚卒保農民安畝畝安宜相望百里閒何天獨於孟城厚

丙戌春上遣使二十餘人挑濬海口悉令召募余邑乃  
私為派夫時值乙酉水災後民不堪命胡侯獨不一應孟

城人至我昔在侯宇下日閉門不曾通誰某竭來遊此忽  
今德之兩旬與侯大扣而小扣職卑祿薄不自輕欲為千載圖不  
 朽參以見聞三嘆息今之司牧所無有落落如侯布天下  
 可使斯民無踐蹂清源龍門聲望高姓名曾自達旒黈有  
 賢不用古所希譬如良玉終必剖鵲起鵬騫更不疑慎終  
 如始余所糾願為河海潤千里沾濡且自通梁笱趨承寧  
 用舒遲吏佐佑常思直諒友辨材必欲致梗楠長禾終不  
 容稂莠規模弘廓意豁然知人善任非自蒞以簡馭繁莫  
 遇勤力餘於事無鹵莽簿書更值閒暇時玉軸牙籤不離  
 手三原王公撫吳日舟中常載李元壽高誦臯陶益稷篇  
 正襟危坐以心受事見歸太僕鹿野翁傳古人讀書乃如此章句纂  
 組非所取胡侯胡侯廊廟器輒竭愚衷叩瓦缶勝之躡履

方起迎當毋以規為瑱否遂寧宮保今大賢拔擢我侯置  
 先後敬附一語効芻蕘采葑采菲忘妍醜淮黃會合日以  
 淤俯視兩郡如在湫增卑倍薄非長策淮南黃北可永久  
 相其水勢決且排略仿古法疏八九印川舊說未足據勛  
 名當使錫圭卣侯能為我建一言立起昏墊登陵阜兩郡  
 千載恒尸祝豈獨小邑頌父母養雞種黍在衡茅材薄猶  
 能刻岫嶁

偶作丙申

寂寞從中隱次且合小休稱心固易足與世本無求咫尺  
 波濤惡尋常風雨愁所需惟一飽辛苦任橫流  
 道路依人拙鳴號都不聞亟為懲咎賦悔作送窮文深谷  
 漁樵侶空林猿鶴羣百年已過半何事日紛紛

放言

黑雲湧天天不雨萬竅號風沙莽莽登高四望心茫然一  
 雁孤飛下平楚深山大澤滿蓬蒿嘆息誰能中梁柱倏忽  
 變化會有時咫尺莫辨鼠與虎淮陰本自畏周叔有材不  
 用棄泥土高冠長劍彼何人大笑柏直口方乳成敗須臾  
 反掌閒干鈞已壓懸絲縷寥寂荒雞時一鳴慷慨中懷起  
 且舞羊腸詰屈車輪摧坐縻歲月守環堵求齊空勞工鼓  
 瑟適越何事資章甫五柳先生歸去來武陵桃源無今古

宿真州

昔時曾住古城邊風景依稀似目前二十七年成一笑荒  
 雞聲破五更眠

六合道中

壬午七月與喬生受百從六合往江寧省  
 試今十五年矣復來過此念受百不可得

見為之  
 愴然

騎驢曾此逐塵沙細席優游歲月賒掌故只因從伏勝校  
 書無復待侯芭平田漠漠孤烟直荒草離離晚景斜猶記  
 伊川雍錄語低徊往事重悲嗟

滁州

青龍橋畔夕陽斜重疊關山曲曲遮遙望西南最高絕不  
 知何處是琅琊  
 庶子遺跡久微茫六一文章萬古光更有醒心亭子在南  
 豐端的嗣歐陽  
 清流闕下成陳迹孫趙爭雄亦已亡涵煦百年無事日遺  
 民未解說滁陽

滁州大柳驛慧月菴牡丹

滁州之西驛大柳慧月菴中誇世守牡丹一株圍四尺虬  
枝盤屈交索紐植根已及二百年花發花開歲月久荒寒  
茆屋三五椽平臺剝圯莓苔厚旁有小株稱重樓曹鄴未  
許齊秦偶山僧頑野不曉事南燭辛夷乃與友綠萼紅苞  
空自芳蛛網縈縈暗戶牖樵夫蕘豎時來過壁上咏吟無  
一有而我到此重嘆息徘徊周覽日及酉傾城國色辱泥  
塗此意毋乃天公負常聞洛陽全盛日牡丹叢叢為澤藪  
三月春風潭沲來舉國遠近狂奔走翠幙繡帷相護遮朱  
欄玉砌橫左右歐陽譜記記其詳爾雅釋草同不朽姚黃  
魏紫天下奇至今詩人常在口風流歷世世相傳千載古  
株徧山阜名園自昔有廢興亂離况值羅李後宮室焚燒  
掃地無根芟剪伐供薪樵遺種都從由孽生萌芽初茁如

乳穀從來造物忌完名瓌寶往往遭擊剖此花流落荒山  
中反以幽晦全其壽得失相乘自如此盛衰有以識寒叟  
僧言此花多靈異先師遺語有從受前年州守移署中二  
年不花懼其咎伽藍入夢送花來花仍如故似指嗾幻語  
要足驚群愚推之於理詎信不浮屠桑下不三宿而以區  
區遂蒙垢花不因之為重輕俗子好怪何足取我作長歌  
材力薄若呼烏烏叩瓦缶聊記滁州慧月菴此花今日比  
敦卣塵埃漲天車馬疾他年莫忘重載酒

旅中興逸上偶談練江聖任兩先生遺事慨然有作  
黃河昆侖來曲折萬派滙嵩嶽鎮當中群山如列隊規模  
氣象閒凜然莫與對嗟余生已晚不及見前輩少小所傳  
聞往往遺烈在英英職方公獨立持清裁意氣薄雲霄直

節寧玉碎正當橫流時赤手障一簣高風振萬古遠與李  
杜配東林天下望公以早歿晦位卑名不稱談者發深嘅  
侍御後起者柔剛非一概風旨相承接瑩潔無瑕類尋尺  
灑江湖縈紆引灌溉晚歲脫塵埃飄飄餐沆瀣與世本無  
爭詎肯厲矛鏃至今閭里間厚德民所載自從兩公亡吁  
嗟不可再淵源無的緒音徽猶未沫先民有典刑側聽多  
清誨時於几席末恍如聆警欬寥寥三十年耳目都不逮  
後生恬所習遂乃恣狂諄議論侈翕訛文章飾藻績岐路  
紛奔馳公與繩墨背偶為誦前脩有若嚼木柿姓名寢不  
識安知所服佩榛蕪塞荒塗往來日憤憤孤鳳時一鳴不  
勝衆犬吠金口而木舌已矣坐自廢陰陰風雨夕復見三  
日朏閒出得吾子磊落刪衆穢偉材越流俗何止什伯倍

疇昔記舊聞引領常眄睐今朝旅寓中相與同慷慨願繼  
兩公後鑽仰振一代掃刮去垢氛誅鋤闢草萊安驅以徐  
行直乃造奧內九原如可作亦獲游車倅微言一以續默  
默悉懲刈余豈識路人壹鬱抱壘塊每欲吐狂言四顧若  
有礙氣味忽相合漫長三尺喙慎勿示世人徒爾增詬誶  
君其自底厲余已安衰退閉口不復道歸歟事耕耒

偶作

達夫五十工吟咏而我明年始及之莫笑老來如炳燭閉  
門覓句未嫌遲

詩有別才詎不爾韻語久已誚南豐杜韓歐李淵源在只  
是無人續正風

大歷以還多作者次山獨錄篋中詩艷辭麗句從雕琢韶



白曰章寧不禾

卷二十一

七

漢遺音自不知  
高山鉅谷識規模  
白日青天有坦途  
千古文章傳正印  
莫教細碎枉工夫

宿胡家莊初入河南界

驅車幾日策疲羸  
路入河南向晚炊  
梁宋由來平似掌  
汝穎翻是鈍如鎚  
沃饒無過中原地  
淳固終於大任宜  
俛仰古今一惆悵  
長歌吟嘆有深期

舊德先疇猶未改  
轉從樸陋見天真  
敢云天下無高士  
只想中州出偉人  
廣廈要需梁棟重  
大圭不假斲雕新  
了翁亦自生南土  
遺語當年豈漫陳

杞縣明末流寇起此

搶攘悲往事  
迴首意多違  
時代有今古  
山川無是非  
水平

舟重載車敗馬啣  
鞭何必爭岩險  
惟當慎此機

行田中

四望平疇合溝塍  
未可尋有風翻麥浪  
無地插秧針待雨  
朝朝急驅蝗  
歲歲心年豐  
人自樂常誦帝恩深

書輝縣志後

奇節千秋著六經  
共城原以共姜名  
首山不近朝歌地  
周召還從史氏評

汲冢書有共伯和與史氏共和說異邑舊云周共伯國此從汲冢書志不能辨註云

衛世子蓋  
兩失之  
毛序鄭箋世所宗  
郢書誕謾更誰從  
自來世子無封國更

合三監說邶鄘  
世子字伯謚共姜從夫謚志云世子封於共又謂之鄘皆非

水石風花日放歌  
洛陽城裏自婆婆  
婆向來堅苦百原上未

必遽名安樂窩  
郢子安樂窩在洛陽邑人因郢子建此志因實之誤

白曰章寧不禾 卷二十一 七

魯齋名字震蒼穹剗削都嗟事跡空何況竇姚邪律輩文章勛業付秋風許姚竇邪律諸公皆邑流寓志不載元史本傳

鄉里於今傳舊鎮竹林遺跡認荒苔志云山陽縣廢為鎮竹林在其地共說未有據也公和偶自逢嵇阮未

信山陽接嘯臺志云山陽縣廢為鎮竹林在其地共說未有據也略記舊聞多抵牾何人辛苦任編摩網羅放失非吾事勝

地而今只一過時將往百泉山

贈胡玉臨

千里驅馳踏軟塵一杯相屬意中新老成如復見前輩謹

慎應緣學古人陳寶五重傳琬琰和聲九變奏韶鈞固知

不負平生志看取規模冠等倫

理學名家思舊德謂學士此卷公循良列傳佩先型謂方伯存齋公清門

久已推三世治譜由來守一經蕩蕩江河都滙海踈踈風

兩自從星當年傳語人如昨更與高吟試靜聽

子諒合作百城師卓魯遺風再遇之寥寂庭空無折葦蕭

條壁立有懸絲優閒並可誇三泰豐樂欣聞咏十奇朝夕

及今常底厲屏藩重望有深期

石稱丈量豈寡失銖積寸累乃無乖十連原自里胥起六

察必從州縣來案牘不留非俗吏風流無取是清才老夫

狂語真堪笑橫浦慈湖論本諧

梁溪曾住小樓偏絕憶當時倍惘然廿載忽過常拊髀余

慷慨來今日細席從容記昔年五十無聞功業晚只應留

取此心傳

與王爾昌敘別

忽漫相逢絕可憐  
龍山常憶共華筵  
青衫漂泊三千半  
白髮蹉跎十九年  
戊寅歲與爾昌別  
何丁不為避世計  
算來只欠買山錢  
與君握手還如昔  
說到當初已愴然

舊遊重數真如夢  
端居堂中歲月遙  
賤子今猶在壑谷  
故人都已上雲霄  
泥塗亥字何須問  
冠劍丁年未許招  
用虞山語  
惆悵共城將遠別  
射湖他日訪漁樵

鍾巨源出示新詩因贈二章

麗句妍辭舊有名  
由來姿態合傾城  
即憑絃索翻新譜  
更聽涼州意外聲

溫李風流有別情  
西崑酬唱接開成  
紛紅駭綠尋常見  
倒寫銀河徹底清

又贈一章疊前韻

邂逅相逢識姓名  
寄懷久已自舒城  
謂書  
引商刻羽何人會  
郢客高吟是正聲

紅袖烏絲自寫情  
淵源遠出庾蘭成  
碧瀾寸寸橫秋色  
用遺

山語  
天與詩人一段清

百泉山道中口占

一帶烟霞望不窮  
蘇門姚許有遺風  
我來願住百泉上  
可得他年附寄公

嘯臺當日獨深悲  
正始風流別有師  
避世詎如嵇阮輩  
未能身到七賢祠

見見聞聞都不同  
荒山寂寞弔遺蹤  
容城已遠睢州歿  
誰與安禪制毒龍

讀書常自思前輩  
到此彷徨意未寧  
四十年來無一事  
橫

經久已負平生

次鍾巨源韻留別

夜看斗轉及參橫征馬群嘶愴別情四望塵沙迷轍跡幾  
番奔走誤平生枋榆未遂當年願湖海空憐後日名惆悵  
河梁吟好句媿君詩律號長城

下帷雒誦一經橫襟韻飄然遠俗情妙語只今推屈子湛  
思久已過揚生擅場大歷知無敵新樣元和合有名相見  
未幾還惜別蕭蕭風雨結愁城

破曉前山翠黛橫清風策策動高情長吟重悲齊三士逐  
世還從魯兩生流落常嗟未卒學支離應怪不求名君今  
託跡塵囂外珍重他年易趙城

問路

平明旅店動征輪纔及半程日向辰一直路從城裏去河南

人皆謂汴梁為城問三义口問道邊人前村髣髴爭驅馬

舊轍縱橫孰識津自是多岐難辨別役夫莫厭往來頻

矚目前途四角輪此行亦自不逢辰半生蹭蹬誰如我中

路崎嶇難傍人莫問田夫能識字既充水手合知津梔言

蠟貌多如此太息還應自咎頻馭車者田夫都不識路

旅中偶作

平疇廣野日揚沙老向征塵閱歲華落落東來一騎馬搖

搖西去四輪車殘春未盡聞孤鴈新月初圓看晚鴉寂寞

黃昏人獨坐幾行題壁字欹斜

舊學分明似畫沙煙霞泉石自清華比年跋涉經荒峪隨

世低昂坐小車斷岫荒村留古樹夕陽流水認寒鴉而今

益信歸來好滿院蓬蒿一徑斜

### 共姜臺

聖人刪六經獨著栢舟節於邶鄘衛中邈邈凜孤潔堅貞  
本天性非為名教繼之死矢一語震厲如嚼鐵高標何聳  
峙寒空斷冰雪龍比一輩人同灑萬古血周禮傳五服一  
父乃具列法以中人制條目何廣設尚餘荒古風陋語未  
刊剗不有守義人孰補綱常缺浩浩洪河翻地軸為之裂  
斷螯施赤手天柱傾不折至今千載下景行仰前哲我來  
平臺上懷古欽貞烈想當孤守時耳目若割截悠悠未亡  
久百念俱灰滅豈顧後世名遺跡留卓傑不知何代築廢  
興凡幾閱人心本不死清風在喘嗅西望太行山俯視同  
邱垤野老不曉事崇構華塗稅翠幙被明璫儼與仙佛埒

吁嗟當年心沉沉苦霧結防身動如律舉足不踰闌胡乃  
效此為九原徒悲咽土偶非其形即當一時撤煌煌立木  
主遺篇大書揭共明靡他義庶足警愚劣我今作此詩其  
猶吹一吷願以示後人餓死無蹉跌伊洛多發明慷慨片  
言決此義自共姜聖經若樹泉賸語記他年重與表碑碣

### 題共姜臺詩後

今之汲縣古沫土孟侯傳世八九數共城遙遙在遠郊謂  
姜處此非其宇東宮西宮古之制何況共伯早死無其主  
寂寥孤守耳目絕不應荒野獨踽踽俗言世子此封國傳  
重不為別子祖且也伯當兩髦時曲沃詎值申生怒或云  
共山下有共伯墓共山之名以此取周人之祔也合之古  
有從葬禮所許百歲之後歸其居便令死骨同朽腐白楊

蕭蕭夾古道孤禽獨叫號悲苦後人於此築高臺想像清  
風萬萬古歷載綿邈臺猶存遺蹟直與首陽伍見聞已遠  
付荒冥後人傳說多莽鹵更指此為共姜葬因其基址崇  
垣堵共山相望咫尺閒豈以孤墳留山隴固知此語未足  
據大類鑽皮出毛羽昔者馬遷稱好奇涉獵廣博肆纂組  
共伯乃入釐侯羨後世至今疑衛武又如汲冢記共和異  
同豈特薛魯鼓筆削不經聖人手紛紛議論終何補共姜  
節義詩所載如圓有規方有矩高臺聳峙名不磨儼若干  
鈞繫一縷邑志草草多缺略願寫此篇續鄭譜

嘯臺

漢終四百九服囂崢嶸特出當塗高削平袁呂拒吳蜀誰  
知三馬食一曹指揮塔序走群雄網羅八紘無奔逃王鄭

孫陳稱舊德萬鈞之重輕鴻毛翹翹車乘多劫束珠摧王  
毀火銷膏死生利害反復手崛起寧得不枉撓先生抗志  
風塵外一身孤孑守蓬蒿被髮穴處猿狖羣默默始知閱  
扁牢苟全性命亦非易相去咫尺翻波濤有時長嘯激悲  
風萬木洶洶增怒號山谷如聞鸞鳳音相見不識徒勞勞  
嵇既養生終不免阮亦東逝隨滔滔固知兩者不俱全祇  
令千載同訾謗泣麟嘆鳳徒為爾挫折豈謂非其遭春蠶  
作繭自成蛹副禕乃過三盆縲千里馳驅超以忽霜蹄一  
蹶傾塹壕前車之覆已如此汨泥揚波舖醜糟失意還如  
快意人俯仰相隨如桔槔

自開封往輝縣途中作

濃李天桃千萬朵春風融冶吹婀娜牆邊老樹澹無花寥

寂空庭明月墮生平不作依人計槎牙碑兀與時左低頭  
 垂翼默無言外閒所見總非我未耐朝市日周旋唯向山  
 中盤礴羸三十年間歎忽過野蠶作繭自纏裹今者胡為  
 驅車來俛仰四顧無一可崛強意氣終不除焦爛直如赴  
 水火閉門僵卧無慙顏信知溝壑非吾禍襄陽一書共歎  
 息誰云退之蹈正軻相排未已轉相效惟中大笑眇與跛  
 浸尋歲月多漸靡琢削節目平磊砢曩時所學今何如忍  
 遂蹉跌同么膺此閒得失判豪釐固塞隄防謹關鎖洛陽  
 二頃無復望拂衣更待何時果天末鴻鵠已高飛世人徒  
 羨沉沉夥

白田草堂存稿卷之二十一終

孫男希周校字

白田草堂存稿卷之二十二

寶應王懋竑予中甫著

詩

寄贈胡玉臨

丁酉

淡沲春光閏月初共城幾日駐征車來看墨綬分符竹更  
 羨斑衣奉版輿倉卒東歸還舊隱低徊北望視新除幽懷  
 無限憑誰說千里遙緘尺素書

絳帳當年幾往還曩時所學一窺斑聲名豈落盧楊後政  
 事今居召杜閒細雨無聲通吠澮長風有力到榛菅安民  
 馭吏腐生話座右箴銘未可刪

寥落風塵飽所諳相州南下再停驂參差忽作經年別躑  
 躅猶留異日談問渡誤傳綠海岼

黃河渡名海岼口

行吟空自傍

江潭北風又寄丁寧語舊德先型更細參

喔伊初倡玉繩低袞袞征塵日又西一去未能尋故約再  
來何日續前題寒花吹落迴無處羈鳥驚飛不定棲可是  
茅簷安穩坐蕭蕭滿院長蒿藜

勞生何計得長閒俯仰隨人一笑慳大地如行九折坂小  
休還憶百泉山不堪潰穴時時補漫把彊弓寸寸彎師法  
只今推兩漢春風且為破愁顏

述懷寄玉臨川舊韻

車馳馬逐趁飛塵翻覆應嗟世局新千里關河逢驛使一  
朝風雨送歸人往來自是無長策行止終當付大鈞窮蹇  
詩人原有分郊寒島瘦可同倫

韝上飢鷹未肯馴飛颺一去解天刑屋傍自樹籠雞柵窻

下閒鈔相鶴經除草決渠驅阿段引帆繫輓笑奴星壅鹽  
隨分何能足叩角悲歌孰與聽

槁梧兀坐得吾師日暮河梁安所之初過晚春花澹澹恰  
逢淺夏雨絲絲蒼茫已作兼旬別邂逅翻成一段奇曾到  
歸仁堤上望幾番搔首憶前期

安樂遺窩接嘯臺攀蘿捫葛路多倩遙想當時成獨往却  
憐此日不重來巖棲澗飲知無分繪句絺章只費才自笑  
崎嶇空好事天公何意未云諧

抱膝高吟一室偏矮箋細寫意愁然三塗谿谷思垂手二  
頃田園可息肩浩浩陰陽催小至紛紛憂樂感中年生平  
不負幽居願賴有清商一曲傳

寄贈鍾巨源疊原韻



西窓剪燭論縱橫  
漂泊偏嗟客子情  
碧水青山纔一到  
春鴻秋燕太忙生  
杯盤草草誰堪語  
驛路匆匆不記名  
嘆息故人原有約  
夢魂猶自遠共城

磊落床頭一劍橫  
抗懷古昔眇孤情  
當年誰識庚桑子  
今日還憐轅固生  
前輩源流如可接  
後來草木亦知名  
羨君闔戶勤穿穴  
奚止風流重管城

寄贈王爾昌即疊前韻

高樓虛敞兩床橫  
歷載周旋共旅情  
自不見來多後輩  
再相逢處似前生  
蕭蕭盡改新鬚鬢  
落落猶傳舊姓名  
接席連茵凡幾日  
又驅車馬去孤城

風波遙見大河橫  
萬折難諳世上情  
淡泊故交非熱客  
雄豪直氣是狂生  
空囊不恨無錢使  
小戶偏能以酒名  
若返

棹時須遇我片帆  
直指射陽城

寄贈胡永叔疊贈玉臨前韻

問學由來久軼塵  
發揮今見一番新  
規模猶記當時語  
氣味還同我輩人  
兩世淵源延寶蔭  
百年典則著和鈞  
偏隅小試經綸手  
雅管風琴自異倫

風操冰霜加峻厲  
空庭閒寂靜儀刑  
神明未見誰之比  
曲折都如舊所經  
却卷波瀾歸一勺  
更從照耀映三星  
循良績茂謳歌遠  
洋溢仁聲滿逸聽

躑躅曾過淇水湄  
風塵憔悴更何之  
長開通德唯留草  
熟看平原不繡絲  
此去生涯甘澹漠  
近來事業轉離奇  
閉門擬作四夫老  
千里重過未有期

一枝上苑曩時栽  
移向河陽未許猜  
形勢久聞全晉別  
山

川都自太行來崎嶇願奉三年最馳驟原非百里才先世  
屏藩推重望 詔書五色即須裁

潤踈音問何時達薊北書來一莞然

謂念堂先生

矻矻說君不

去口英英如子孰齊肩殷勤笑語連三月

乙未春晤於京邸

莽蒼

風煙又兩年屈指後期無定在新詩好附驛筒傳

### 七夕雨

織女黃姑事竟非穿鍼貫縷意多違癡雲常在明河沒驟  
雨初來野鵲歸萬里不通京洛夢十年猶守故園扉方心  
未鑿憑誰乞奕奕空傳五色輝

### 題墨芍藥

戊戌

艷態濃姿已盡刪一枝新自洛中還相逢莫恨緇塵染別  
是人閒冰雪顏

蕭蕭孤韻澹幽襟水墨應知著意深素質不為兒女浣却  
從朝市覓山林

### 題畫紅蓮花

搖曳一枝倚水斜冷踈偏稱野人家無端也著臙脂色拍  
手來看富貴花

月曉風清水一涯淋池何日更移栽夢中似到麻源谷十  
丈蓮花變碧開

凌波仙子媚幽姿歛袂新妝不自持老去風情渾減却也  
應不作女郎詩

### 和瓶中荷花六首

遠郭荷香認舊溪積陰無奈客中棲一枝低亞瓶中見不  
問門前十日泥

燕支淡抹醉春酣繁麗何須憶水南却笑崎嶇多好事盲  
風怪雨過空潭于宮封事出郊看荷

搖颺輕紅映碧空秋光掩冉畫簾中長廊一過香如縷不  
羨淋池十里風

酒暈無端上玉肌數枝綽約比瓊姿西洲別有無窮恨不  
到風清月曉時

曾蕩輕舟出小津藕花四壁靜無塵秋風斗起雙塘夢元  
是山閒林下人

名花暫對可銷憂胸次翻添一段愁三十年來成故事迴  
峰亭畔記嘗遊縱棹園荷花最盛迴峯園中亭名

夜坐偶作  
端居消永夜泊與淡相宜身老長閒日心清久病時秋聲

來樹裏月色上簾遲會得此中意孤吟一卷詩  
山林麋鹿性朝市總非宜歸夢三千里鄉思十二時高城

花發早深谷水流遲不盡平生意波瀾付小詩  
和元溪移居四首

散髮狂歌紫府仙塵埃不斷忽羈牽寂閒未肯留三洞安  
定於今試五遷詎有園池比履道賸將草木寄平泉人閒

適意都為樂策策秋風起暮蟬元溪在京師凡五易居  
塵沙撲面走中衢轉入幽居景物殊老樹當門新翠合平

臺一望晚煙鋪重吟元亮閒詩句更榻洪厓舊畫圖火急  
發書聞上黨寶安今已換桃符念堂先生嘗謂元溪當移居今在上黨元溪舊寓寶

寥寂揚生宅一區篋藏千卷足清娛十年喬木中梁柱萬  
安寺

白田草堂字高卷二十二五

白曰草堂不刊 卷二十二 五  
里丹山引鳳雛家具紛紛尋短檠詩筒日日走長鬚求羊  
來往添幽興不比東隣濫瑟竽

穿徑誅茅築小邱杖藜亦得暫優游入門曲折迷新術當

牖橫斜認昔遊惠仲孺舊寓此仲進未堪稱北部士龍且

合住西頭復同正則相隣近接席連茵語未休謂葉松山

和元溪懷坡四首

老櫬兩兩倚前陂矗立中庭氣象多門外野風吹不斷時  
聽竽籟好經過

雜纂空林淡靄生哦詩日日繞堦行却看密雨跳珠過便  
已循除灑灑鳴

築土為陂試手初安排都作野人居南榮藥草多名品帶  
露和烟摘小蔬

櫬陰曾誦長公銘公望終期列鼎局赤管一雙時起草精  
思還構院中亭

余癸酉省試表叔喬楮堂先生畫枸櫞一枝贈予附

詩曰蕙帶圍寬訝沈郎筆鋒銷畫業全荒幾年不

屬櫬花管一樹撐霄著意黃時先生卧病樂志堂

堂中有老櫬一株故作此詩蓋以不與省試為恨

也未數年先生卒畫亦失去今年元溪於京師移

居門有櫬兩行元溪為作櫬坡作詩紀其事余因

追誦先生舊作為慨然久之乃書以貽元溪再次

元溪韻四首

門前小築號櫬坡扶杖經行感慨多舊輩凋零都欲盡三  
生還記一來過

會從許史識班生老驥橫空萬里行卧病五年秋聞寂寫  
來都是不平鳴

唐昌崇敬惱辛迂憔悴江潭更卜居折得黃花堪一笑荷  
鋤歸去種春蔬

相見當時只眼青青草戶潛扃廿年舊事無人說香  
雪而今故有亭

封事元溪寓齋各有菊數十本元溪以詩貽封事索  
和余亦同作用元溪韻

朝市偏餘野興濃寒花層疊半弓中廿年豪舉三人在

年前賞菊念堂先生齋中痛飲累日今惟余二人同在京邸餘皆散去一種鄉風兩處同傲

逸不隨鷓鴣侶蕭疎終託桂蘭叢明年何地成追憶願向

真僧問色空時余將歸坐中曾某亦屬和

題張淵度我與我周旋圖

是非得失不須論相對應知面目真世事分明同一局願  
為縮手袖閒人

兀坐空齋影答形眼看蠻觸幾輸贏楸枰不比彈碁樣却  
似中心也未平

決戰原爭一著奇乘空闔捷總非宜運旋別見經綸手珍  
重當初未下時

同形異體自相親覲面寧殊越與秦四海弟兄都賸語看  
來只是一人身

贈汪拙存

霓裳同詠大羅天誰是蓬萊最老仙白髮蹉跎常自笑君  
今猶較十年前

上苑移根已別栽三行六察望君來朱丹正在磨研日看  
取他年柱石材

題魏東瀾小照 己亥

金匱流傳已久湮今朝拈起一番新朱絃大有遺音在親  
見羲皇以上人

千五百年無作者河閒微旨溯長沙別傳只繼彥脩後記  
取嵩山頌一花

秘典旁篇常徧尋清虛畧不浣塵襟華陽原是長桑輩碧  
嶂丹崖深復深

恨不將身入此圖共君淡話穩跣跌憑誰更乞吳興手為  
補春風杏一株

訪俞葭白不值寄贈二首

望中莽蒼舊風煙邂逅難逢一悵然歲月蹉跎吾輩老胸  
懷跌宕古人傳湯云不見同千里若較相從遲十年他日  
論文重有約拙疎應已笑華顛

卓犖高材獨有君典刑未遠記前聞煙波自放江南棹馳  
驟終空冀北群意氣憑陵推盼札文章聲價重淵雲希微  
別溯平生事宴坐焚香對夕曛

又贈二首叠前韻

渺漠長林暮晚煙相逢握手倍欣然詩從大歷多分派文  
到元和有別傳細席共論追昔語短箋重寫記當年空塔  
滴瀝西窓雨却恨東風太放顛

曠度虛懷孰似君相推豈獨在多聞小山莫問曾成賦大  
雅於今自不群岐路原知分楚越壯遊猶未到燕雲空齋

白田草堂存稿 卷三十一  
跌坐無窮思一卷南華日已曛

呈遂寧張公十二首

辛丑

榮光淑氣拱嘉辰遙矚清宵佩德新  
落落公才蟠柱石峨峨高節襲蘭蓀  
百年制作推夔高四國經綸重甫申  
盛績只今垂紀載竊緣歌頌敢重陳

霓裳曾記大羅天高步瀛洲羨老仙  
賸有文章宣鳳誥別將勛業績麟編  
典刑常在思前輩衣鉢猶留啟後傳  
陸相千秋刊奏藁常楊他日可齊肩

中朝標望軼羣英退食從容識老成  
露冷三霄金掌迴冰凝一片玉壺清  
搏風直上高秋鷲擊水偏迴橫海鯨  
舊事曩來多道說日聽鐘鼓共砰訇

經術還將試望之慈良合作百城師  
勤無留牘常先事清

不收聲凜自持靈雨丝丝隨夾轂  
長風浩浩竦寒帷只令內外多敷歷  
帝眷真如夢卜期

秉節擁旄重撫綏規模遠與召郇齊  
養禾先已鋤根莠牧馬還同服兕犀  
醲澤旁流江左右輿歌並起浙東西  
醇儒事業今無忝兩兩華星映壁奎

三吳視學更超然自有此官無此賢  
徑竇應知皆斷絕朱丹總已入磨研  
盡收弟子三千輩獨占聲名二百年  
曾著青袍同鵠立龍鍾深自媿雕鐫

睿畧神謨承指授江淮千里固苞桑  
水門灌注遵成算石堰波濤謹舊防  
歲計度支無漏溢外銓選補共搜揚  
科條願放南豐記銘刻深恩永不忘

成功久已勞嘉績制詔新來墨未乾  
底定九川歸禹貢

白曰草堂存并 卷二十一 九  
整齊六典冠周官統均已令網維正燮理還期社稷安紫  
閣黃扉遲並入沙隄遙望萬人歡

水鏡中懸仰鑒裁網羅此日八紘開知人本是安民事報  
國元從得士來珪璧琮璜廊廟器榱桷梁材鄙人  
也與韓徒數却笑移根未許栽

耆壽於今留厥服巖巖風采壓朝端峻嶒直似千尋碧傾  
灑惟憑一寸丹薑桂不嫌老去辣雪霜偏著曉來寒旂常  
竹帛平生事更擅英名久遠看

寂寞深齋靜不囂笙鏞未肯比仙璫遭逢恰值隆平日福  
祉還同衡霍高老圃共看榮晚節清池原不玷秋毫由來  
天壽推平格伊陟巫咸選舊勞

拙守何能世事通只應憔悴老蒿蓬身居唯諾干人外心  
識淵源一脉同薄伎敢云還席上塵蹤猶未處囊中白鷗  
浩蕩煙波遠回首崇階意不窮

題張氏武功圖

聖神統八極彌覆徧海寓京口宿重師荆揚扼門戶張公  
遼陽來雄姿猛哮虎啣命治水軍握節居北府逆氛起滇  
南浸淫蝕全楚縱橫巴岳間洞庭遮重阻公時初至鎮文  
書插飛羽忠義不辭難慷慨率所部自皖達武昌備守固  
疆圉倚公如長城千里皆安堵勇氣突無前不築濡須塢  
移屯詣行營願分左右拒湖水浩淼衆賊蜂蟻聚屢戰  
挫其鋒北向落爪距柏直彼何人大笑口方乳竄伏洲渚  
中進退若狐鼠腹心已披裂手足尚枝拄公為計劃除克  
敵在樓櫓輕舟便轉旋仰攻非其侶飛章上陳請 天子



重嘉許意匠辦經營艤舸昔未覩平乘益州船駭稱越公  
武掃刮盡巢穴尅期在一舉戈甲耀日光輝赫震金鼓波  
濤簸春天激射恣風雨桃花及柳林搏戰日四五斬馘數  
千萬纍纍就擒鹵江漢為廓清遁逃無處所乘勝復向郡  
破竹孰可禦羣帥爭馳驅借公餘勇賈拍手唱鏡歌一麾  
貔貅旅矛戟列森森化作兩階舞方賊大至時惕息未肯  
迂帷幄首建策夾攻乃可取直從肘腋旁橫刺斷腰膂死  
咋無尺寸賊勢為崩沮舳艫相啣接日月離寒暑青絲白  
馬輩強半膏刀斧匪徒籌畫工獨立肩艱鉅譬若共捕鹿  
論功疇與伍當以袞衣歸中朝屹梁柱充國守衛尉老成  
屬肺腑爾宇更啟封帶礪誓茅土逡巡還故官長揖倚大  
樹保障自所職顧視舊印組迴憶八年來矢石日交午寢

食不遑暇下卒同甘苦今已底安定南徐仍填撫東山言  
其完部曲樂酒醕灑然何清閑道古且語語命筆繪此圖  
深心寄毫楮以斯貽後人靖共念爾祖不學杜當陽勒銘  
水之滸余生不及公嗣君結縞紵披圖欽英風褒鄂安足  
數遺蹟邈生平俯仰感今古愧無韓柳筆未敢續後序聊  
效關中詩庶幾配吉甫

呈鄭魚門先生

海內聲名仰斗魁稜稜風節厲清裁歐蘇只作文章伯枚  
馬空傳侍從才衡岳峰尖一柱立黃河水曲兩崖開高名  
千古誰能似宋司馬公今再來

洛閩承學久微茫墜緒於今誰獨當箋註旁羅同鄭服淵  
源統壹過荀揚文皆載道裁新語行本躬脩凜舊防百鳥

白日草堂存禾 卷二十一 二  
喧啾塗耳目却看孤鳳自翱翔

視學由來為重選當官正色總澄清力崇古雅歸繩墨盡  
屏浮囂屬老成問學必須求實用文章不肯誤空名棟梁  
榱桷同收拾留與他年作國楨

往緣重望多苛細或以公心付混同清節已如懸白日虛  
懷仍是坐春風妍媸不爽存真鑒絲粟無遺合大中八十  
年來稱迴出黃扉紫闥仰穹窿

曾侍絳紗傳六學散材深自媿雕鐫南歸原已承恩賜北  
望於今歷歲年躑躅中塗惟自笑遲迴末路更誰憐師門  
依倚真多幸願假搏風上九天

又呈鄭魚門先生

理學中朝夙所傳清名介節益巋然已知試玉滿三日更

看樹人期百年一振瞶聾啟後覺獨支梁柱續前賢便令  
文教同鄒魯徧拂春風入管絃

國以人材繫重輕礪磨追琢出琮璜治經應繼胡安定養  
士還如許仲平几席一時來問學巖廊他日共功名行難  
猶記韓公語薑桂參苓在藥籠

報國文章猶未盡畹畦重疊蕙蘭叢扶持道教存清議刻  
革浮華追古風絕續詎云一髮力隄防直障百川東儒生  
事業今無負力過况雄見此翁

本朝人物推湯陸三十年來誰繼之公望久知歸彥國羣  
情都已屬敦詩願為社稷無疆計正值黔黎待澤時遭遇  
聖明千載會姓名端合重台司

崩崑羣山仰岱嵩淵源兩世荷陶鎔伊川錄載楊遵道徽

白田草堂存稿 卷二十一  
國書傳蔡九峰樸學自慚附末籍幹材何敢問遺踪頌歌  
推說吾徒事俯仰深思大澤濃

呈山陰王公

高步橫空入紫闈瓊林早起散芳菲中原文獻承家舊天  
下英才曠世希翠壁千尋杞梓合碧霄萬里鳳鸞飛典型  
海內推前輩卅載靈光已獨歸

分符三載共歡康幕府初开辟峻良沾灑一同咸布濩遲  
留半刺久徊翔名高卓魯仁恩遠跡筵郝王歲月長獨任  
華虛遺悃幅却教人頌子雲章

千秋遺愛在桐鄉兩地遙望久不忘九曲微波多潤澤一  
支餘力更劬勦吳陵歌詠思逾切漣水依歸樂未央他日  
屏藩膺重任不須重說杜當陽

兩瀆交流日阻艱宣房久已慶安瀾許商議上無能決王  
景功成且未還謾說治坊陳北闕誰將問水繼東山淮揚  
保障惟公在引領河渠 特詔頒

流輩飛騰多歷年而今耆壽更誰先險塗久已經三折中  
策還為計萬全屯氏河常通渤海菜華水不漲桑田崇庫  
遲速何須問看取勛名勝印川

瑞靄榮光壽域開稜稜標望近魁台平當原領河堤使桓  
郁且從少傳來徵召必為梁柱用追隨深媿楠棗材執經  
門下常依倚敬進南山酒一杯

劉明府署中牡丹冬至後開兩枝分賦二首

玉雪珠冰萬里天忽從庭際轉暄妍宣華栽後花多幻瓊  
島飛來種是仙瑞策樂安添舊譜清詞興慶入新絃一陽

白田草堂存稿 卷二十二  
初動迴寒谷大地春臺總盎然  
名品久知推首冠更驚此口艷朱欄不隨桃李爭芳節來  
共松筠守歲寒小會正從五日樂晚花又得一枝看秋江  
莫恨東風早到此遲遲可盡歡

呈孝感屠公

壬寅

偉才重德冠羣倫衆望咸歸社稷臣正色立朝資弼亮建  
牙開府著經綸遭逢幸值千年聖布濩欣看萬物春四海  
蒼生同仰命巖廊又見衮衣新  
長風遐被海瀕遙共樂昇平答 聖朝號令分明懸白日  
襟懷高迴傍清霄特崇惇大蠲苛細壹準虛公屏雜囂好  
是運旋經國手鴻恩溥洽徧謳謠  
直上雲霄緣自致遷除都是 帝親裁早聞抽擢離常調

新賜旌旄領外臺樸重合為鼎鼐器瑰瑋獨取棟梁材符  
君乃見真儒效渭水商山今再來

老成碩望今為最邁世高標未可攀勲業直追伊傅輩淵  
源自在軻雄開虞廷制作先咨牧孔室文章久鑄顏收拾  
正為榱桷用草茅應自媿榛菅

又呈孝感屠公

岸嶽羣山仰岱嵩經綸原自問儒宗明良遭遇風雲合侯  
甸甸宣雨露濃一代聲華推賈董千秋事業接夔龍鯁生  
載筆居門下願寫勲庸著鼎鐘

楚澤尋陽九派通扶桑散彩見朝曦學通濂洛源流遠文  
到周秦氣象尊碧海鴻濛變化丹青寥廓鳳騰騫科名  
未是平生志治譜由來細討論

稽古愛民承舊學奉公砥節號廉平當官常盡孜孜力所  
至皆留赫赫名仕路風塵原自苦書生氣味本來清 詔  
書早表公卿器要取循良作國楨

霖雨蒼生仰化權子諒寧止此心傳六雄四輔從詳試五  
長十連以最遷閭里具諳凡曲折吏人久與共迴旋要令  
榮戟弘殊績故教逡巡歷歲年

百里何當局短轅拚飛應自脫籠樊方隨墨綬從常選便  
入黃扉侍 至尊不假吹噓名自識一無憑藉面承恩共  
傳 帝眷多優渥拔擢真同夢卜論

往在東臺批勅日恰逢南國校文年材求杞梓中梁柱韻  
合笙鏞入管絃自是聖朝無缺事肯教平世有遺賢諫垣  
衮職雖多補長育人材吏最先

朱紫原同涇渭分力從雅正掃紛紜清標峻特裁通牒遠  
鑒精明試雜文此日嚴顏書竹帛他時王魏出河汾年來  
重錄登科記自笑終為燕雀羣

幾時公望屬巖廊祇覺遲迴歲月長玉出方流多照耀驥  
經長坂且翱翔一朝耆舊推韓富三輔聲名繼趙張最是  
兩都鎖鑰重又教鎮遏事勸勸

清操原不染埃塵蒸變還期德化淳已以寬和持大體兼  
之明斷布深仁封疆寧謐都無事州郡網維在得人措置  
規模已早定芻蕘猶自廣咨詢

馮翊新從 特詔回經營又藉股肱材加官僕射統行省  
持節中丞領外臺政記科條明日月令行庭戶動風雷文  
星今日臨牛斗會見端門歷上台

白田草堂不刊卷三十一  
三五  
向隨細席侍終朝四卷纖雲望碧霄程學何堪追呂謝蘇  
門未許並秦晁絕編猶自尋脩綆掛壁無由挽大弨所得  
只今惟固守荒村風雨自飄搖  
袞袞風塵跡未安中塗躑躅事愈難避人只為多生語奉  
母惟思就冷官苦竹不因經歲改清霜更覺曉來寒師門  
南望長翹首願假搏風振羽翰

題劉雲岫歸隱圖

翠壁丹崖峻以巋蒼藤古木轉幽閼靈境杳與人世殊武  
陵桃源留髣髴桐帽琮鞋方竹杖一邱一壑情所寄繁華  
都盡萬緣空蒼茫不記平生事悠然心與白雲閑沿澗穿  
林隨所值出入高下一俯仰桂花松子常滿地水清石瘦  
樹益竒歷歷可作山棲志園綺未是世外人深谷逶迤且

自恣却看此日眉宇閒凜凜常帶英雄氣印湖舊剖河山  
盟闕閱元將怯薛比叱咤風雲變化生繡衣貂裘擁鐵騎  
南北驅馳萬里行歲月荏苒慚故吏提鼓援枹臣之職大  
笑不作妄校尉從此掉頭不少住貴富棄之如敝屣乘興  
方為五岳遊我寫此圖聊寓意當今寰宇頌昇平邊鄙閒  
有羽書至頻陽老將衆所推金城方略誰擬議據鞍上馬  
矍鑠翁萬里尚藉帡幪庇功成長揖歸去來蕙帶荷衣返  
故肆平原門下公孫龍載筆還能說同異

山安署中偶作

徙倚坐匡牀閒銷半篆香文章從鹵莽事業就荒唐信手  
繙詩冊安心入醉鄉相逢唯一笑不用熟黃梁  
永日留官署風清燕寢香淒涼寒范叔慷慨老馮唐躑躅

白田草堂詩集 卷二十一  
悲岐路裊徊念故鄉塵埃方未息敢自計持梁  
淵源名亞子一瓣有分香舊學窺濂洛新篇續漢唐專愚  
可自許寂寞是吾鄉堪笑隨陽鴈區區謀稻梁

醉中書贈王桐崖世兄

幸接荀君座衣裾惹暗香高談裁晉宋古義引虞唐虛薄  
慚書麓沈冥託醉鄉西窓共話久只自問挈梁

徐雲岫見貽二章即用原韻贈別 癸卯

粗糲何曾具一餐荒齋相對只空盤乍逢不覺多長語贈  
別無能媿冷官自古書生常寂寞而今人物正艱難與君  
握手期何日願共松筠守歲寒

公望交推第一流那能述作與同遊江湖寥落三年夢風  
雨縱橫萬里秋行道著書端有命山林朝市定誰優蒼生

四海羣企仰會見甘霖徧九州

答友人見贈即和原韻

泉石煙霞未許尋寥寂相對酒盈襟講堂漫說啣三鱉東  
閣還容戲五禽時病足未愈濩落江湖違壯志銷磨歲月寄微  
吟閒關一聽籠中語誰識平生萬里心

奔走風塵四十年而今鬢髮已皤然掉頭不住誰知我白  
首空歸豈問天已坐虛名真自誤肯令承學竟無傳晚來  
閉戶勤脩緝不使風光落酒邊

空齋獨坐費幽尋斜掩西窓月滿襟嫩綠兩瓶新日注硬  
黃一卷舊來禽唱酬無復聞高論徙倚空餘自冷吟萬籟  
不鳴群動息此時應見古人心

題詩重與說當年往事依稀倍悵然福地潛通小有洞仙

班同憶大羅天老來非復少時別妙句猶憐萬口傳握手  
未知何日事相思應寄皖江邊

別丁寅兄即用鈍人先生原韻

拙迂無適用寂寞束高閣風塵三十年未肯嗟留落竭來  
博士署閒居理舊學同僚得素心晨夕共商榷不愛夔龍  
薦庶尋孔顏樂 詔旨來自天厚事期大作梧鼠五技窮  
安敢冀奮躍願返屠羊肆仍徇道人鐸量力固不任匪云  
自待薄古來樊種輩名高氣轉索豈有嘉謀猷可以佐帷  
幄徒然遠別離邑邑數日惡

題朱界陶先生百二圖 丁未

雄材超逸冠羣倫林壑未許偕隱淪白首耆艾典刑在嘆  
息今為無事人曩對大廷聲輝赫諸公動色江都策青蠅

營營側目多遭逢知己真何益一朝小試活國手政績流  
傳在人口胸臆約結未得施舛戾紛紜掣其肘翻然遂賦  
歸去來睥睨莫識棟梁材縮手袖閒亦已矣清泉白石且  
徘徊精神强健老復壯南窓日在羲皇上咏吟道里常慨  
慷千里郵亭入詩帳俛仰歲月疾於風八十年閒似轉蓬  
靜中却憶坡公句一日寧僅兩日同人謂東山將復起貫  
穿綜練有誰比公作此圖一大笑百歲逍遙巖谷裏天外  
冥鴻羽為儀左塾右塾弟子師言談辭氣如疇昔絕憶少  
小侍公時眼看世事皆邂逅變化反復竟何有文章亦足  
自怡悅豈必勛名圖不朽我今未老已多憂半生鹵莽合  
歸休何當九垓期汗漫夜夜從公秉燭遊



白田草堂存稿卷之二十三終  
 曾孫直至校字

